

*ASO LULU, 9 OKETOPA 2013*

*Na nofoia le Nofoa e le Fofoga Fetalai i le itula e 9.00 i le taeao.*

**Tatalo.**

**MALELEGA MAI LE AO O LE MALO**

*Na fofogaina e le Fofoga Fetalai Malelega mai Lana Afioga Mamalu, O Le Ao o le Malo.*

1. “TUSI mo:

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaofa Faitulafono e iloiloina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Galuega tau Leoleo 2013.

TUUINA ATU i lou nei Lima i lenei Aso Lua 8 o Oketopa i le tausaga 2013.

(Sainia): Tui Atua Tupua Tamasese Efi  
**O LE AO O LE MALO.**

2. **TUSI FAAMAONIA O LE TULAGA FAANATINATI.**

E tusa ai ma aiaiga o le Tulafono Tumau 99(2) **O AU, TUI ATUA TUPUA TAMASESE EFI, O LE AO O LE MALO,** ua ou tuuina atu nei le Tusi Faamaonia o le Tulaga Faanatinati o le Tulafono Tau Faaofi ua faali atu iinei mo le tagofia e le Fono Aoaofa Faitulafono i lana Fonotaga o lo o faagasolo nei.

Malelega mai le Ao o le Malo

1. Tulafono Tau Faaofi o Teuteuga o le Tulafono o Galuega tau Leoleo 2013.

TUUINA ATU i lou nei Lima i lenei Aso Lua 8 o Oketopa i le tausaga 2013.

(Sainia): Tui Atua Tupua Tamasese Efi  
O LE AO O LE MALO.”

FOFOGA FETALAI: E momoli atu le faafetai tele i lenei taeao fou. Ou te ofo alofa atu foi ma faatalofa atu i lo tatou Maota i ona tulaga aloaia i lo outou alafai mai i faguga lelei i le tuua ai o la tatou Fono i le aso ananafi, ae faafetai i le Atua o lea ua tatou feiloai ma tatou sagisagi fiafia i Lona alofa faaauauina pea mo i tatou Lana fanau ua mafai ai ona tatou toe faatasi i lenei aso.

E momoli atu le faafetai tele i le paia maualuga o lo tatou Maota i sui usufono mamalu uma i lau Afioga i le Palemia ma le Kapeneta, vaeane lea tala-na-atoa i le Taitai o le Itu Agai ma sui usufono mamalu uma o le Maota Fono, ua malo le onosai mai i le tatou Fono i lenei taeao.

E ofo alofa atu foi i le paia ma le mamalu i Faauluuluga o Matagaluega aemaise Samoa ua potopoto e ala i la tatou Fonousu.

E faafetai atu foi i le tapuaiga a lo tatou atunuu i ona tulaga faalupelupe. E talitonu o lo o tapuaia lo tatou alofaiva aemaise fuafuaga o le a tatou feagai ai i lenei aso. Alo maia, e talitonu le faamoemoe o le a faagasolo a tatou galuega.

TULAFONO TAU FAAOFI O TEUTEUGA O LE TULAFONO O  
GALUEGA TAU LEOLEO 2013 – faitauga muamua

FOFOGA FETALAI: Tulai mai lau Afioga i le Minisita mo Leoleo ma Falepuipui.

Afioga Hon SALA FATA LISATI PINATI (Minisita mo Leoleo ma Falepuipui): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega tau Leoleo 2013 i lona faitauga muamua.*

*Faaluaina e le Sui Palemia ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
GALUEGA TAU LEOLEO 2013 – faitauga faalua**

**FOFOGA FETALAI:** Talu ai ona ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoa mo le faitauga faalua.

Tulai mai le Afioga i le Minisita mo Leoleo ma Falepuipui.

**Afioga Hon SALA FATA LISATI PINATI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega tau Leoleo 2013 i lona faitauga faalua ma ou te fia tautala faamalamalama i ai.*

*Faaluaaina e le Minisita mo Galuega, Felauaiga ma Atinae Eseese, le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Fesoootaiga ma Faamatalaga Tekonolosi.*

**FOFOGA FETALAI:** Tulai mai lau Afioga i le Minisita mo Leoleo ma Falepuipui e saunoa faamalamalama i le Tulafono Tau Faaofi.

**Afioga Hon SALA FATA LISATI PINATI:** Lau Afioga i le Fofoga Fetalai faapea le Fonousu a Samoa i le afio o le Palemia ma lana Kapeneta aemaise foi le mamalu i Usugafono a Samoa.

O lenei Tulafono Tau Faaofi, ua faamoemoe ina ia teuteu ai le fuaiupu 13, e avanoa ai leoleo mai atunuu i fafo, e faapena foi i leoleo sa galulue muamua, ina ia umia le tofi o le Komesina o Leoleo, ma soloia ai le Vaega III, Vaevaega 4 lea o lo o faavaeina ai le tulaga tofi o le Sui Komesina o Leoleo ma ia teuteuina le fuaiupu 51 o le Tulafono Autu e faaleleia ai tualumaga e faasino i suesuega i soliga o tiute tauave ma faasalaga.

O lenei Tulafono Tau Faaofi e 5 ona fuaiupu. O le fuaiupu 1: ua aiaia ai le igoa puupuu ma le amataga o le Tulafono ua toe teuteuina.

Fuaiupu 2: ua teuteu ai le fuaiupu 13 o le Tulafono Autu ma aiaia ai mo leoleo mai atunuu i fafo, e faapena foi i leoleo sa galulue muamua, ina ia umia le tofi o le Komesina o Leoleo.

Fuaiupu 3: ua soloia ai le Vaevaega 4 o le Vaega III lea o lo o faasino i le faavaeina o le tulaga tofi o le Sui Komesina.

Fuaiupu 4: ua teuteu ai le fuaiupu 51 o le Tulafono Autu, e faaleleia ai mataupu e faasino i suesuega i soliga o tiute tauave ma faasalaga. O le teuteuga na faia ina ia aofia ai Komesina Fesoasoani e avea o se sui auai ma ia suia le Komesina i le Komesina Fesoasoani e avea ma tagata e faia moliaga o se sui mo so o se soliga o tiute tauave. I le ma lea, na faaofiina foi o se aiaiga e maua ai e le Komesina le pule faitalia e faaee atu ai se faasalaga e faavae i luga o fautuaga ua faia e le Komisi Faamasino.

Fuaiupu 5: ua aiaia ai mo se aiaiga tau soloaiga mo le sologa lelei o le fesiitaiga o Sui Komesina o Leoleo o i ai i le taimi nei, na tofia i lalo o aiaiga ua soloia.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

**FOFOGA FETALAI:** Malo faafetai saunoa faamalamalama i lau Afioga i le Minisita e a ia le Tulafono Tau Faaofi. O le a tuu atu le avanoa i se sui usufono e fia saunoa.

Ia malie le sui usufono mo Faasaleleaga Nu.2, se i tuu atu le faamalamalamaga faaopoopo a le Malo. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, o lena ua taoto le Tulafono Tau Faaofi e pei ona saunoa manino i ai le Minisita o lo o gafa ma le Tulafono Tau Faaofi lenei po o le Minisita mo Leoleo ma Falepuipui.

O le auau atoa lava o le Tulafono Tau Faaofi i le vaega tonu lea i le avanoa ina ia aua ne i tapuiina le avanoa i le tulaga lea o le Komesina. I le matau atu i isi tofiga a le Malo i isi Faauluuluga o isi Matagaluega, e tatala pea le avanoa ina ia lautele le avanoa e avanoa ai foi ma latou o tama fanau a le atunuu o lo o alaala i isi atunuu, ma o lo o latou umia foi pe sa umia tofiga maualuluga faa-leoleo ina ia avanoa ai e talosaga mai i inei. O lea foi la e faapena ona tatala le avanoa faalautele i le mea lea o le tauva ina ia i ai le tagata e aupito sili ona i ai uma agavaa e moomia mo le galuega.

O le isi lenei Matagaluega ua lailai ai le Malo i le anoano o le mau faitioga, aemaise faitioga mai le Maota lenei i le tele o faaletonu i le feagai ai ma le tali atu a le Malo i le anoano o le mau faaletonu e tutupu mai, ae i ai lava lape i le le atoatoa o le faatinoga, a o lea foi faatinoga e afua atu lava i luga lau Afioga i le Fofoga Fetalai i le Pulega. O lea foi e vaavaai atu e tele lava le mau faitioga o lo o aumai i le Malo i ia mea i tusitusiga, ae agai mai lava i le filifiliga o i latou e tauaveina le Pulega o galuega. O le a le mea o le a mafai e le Malo pe afai ua tapui, na o latou lava ia e i totonu i ina e mafai ona talosaga? Afai lava la na o le toalua pe toatolu, ona faapena foi lea ona pu-moomoo ma vaapiapi le filifiliga. A o lea lava ua tatou iloa i aso nei i le tatala o le avanoa e tauva, na o mea lelei tatou te maua mai i le tauva, ae a tapunipuni avanoa ina ia pu-moomoo ma vaapiapi le filifiliga, o le tulaga lena e i ai, e le mafai ona tatou maua ni mea lelei.

Lau Afioga i le Fofoga Fetalai, o le aotelega lena lea ua ou toe tulai atu ai e faaopoopo atu i le saunoaga a le Minisita mo Leoleo ma Falepuipui. E le faapea o se isi auala, a o le matau mai, o a galuega lelei tatou te faia, o galuega e mafua ona fai ona o le atunuu. Ia tali atu i le sulufai mai o le atunuu ma tatou taumafai ina ia filifili tagata e agavaa ina ia faamalieina le tulaga o lo o moomia e lo tatou atunuu, aemaise lava le itu lea o le malu puipui o lo tatou atunuu i so o se auala e faapei ona naunau i ai le Maota lenei i le tele o a tatou Fonotaga ma soalaupulega o lo o faia i totonu o le Maota o le Palemene.

Lau Afioga i le Fofoga Fetalai, o le toe faaopoopo atu lena.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

**FOFOGA FETALAI:** Malo faafetai le saunoa faamalamalama i lau Afioga i le Palemia ona ua manino ma malamalama atili ai le tulai mai o lenei Tulafono Tau Faaofi taua i lenei taeao.

Ou te manatu o lea e fofou mai le sa, lau Afioga i le sui usufono mamalu o le sa tu i le foe o le Matagaluega i ia aso - se i aumaia lau faautaga.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Malo faafetai i lau Afioga i le Fofoga Fetalai mo le avanoa.

E auai faatasi foi lenei Usugafono i le viiga ma le faafetai ua siitia e lau Afioga i le Fofoga Fetalai e faafetaia ai le alofa ma le agalelei o le Matai Sili i le lagi ona ua taitai manuia mai le paia o le Maota mai le aso ananafi seia paia foi lenei taeao fou i ana fonotaga, e fafoi pea le viiga, le faamanu ma le faafetai i le Atua e Ou mea uma. Ae faafetai i lenei taeao fou i le maleifua mai o lau Afioga ma le mamalu o le Palemene aemaise foi o le faatulai mai foi o lenei Tulafono Tau Faaofi pei ona tuuina mai i luma o le Palemene e le Afioga i le Minisita mo Leoleo, e talitonu foi o lo o i ai tulaga faanatinati, ia ona o le manatu o le Malo ma le Faigamalo, ia o tulaga lava pei ona saunoa foi le Afioga i le Palemia i tulaga o le Matagaluega o le Leoleo, e le o toe na ma le laina i le silafia e le Maota ma le atunuu i lenei foi vaitau ma le vaitaimi o lo o i ai nei Matagaluega.

Ia e momoli atu le agaga faafetai i lau Afioga i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei lenei Tulafono Tau Faaofi ua tuuina mai, ma i le maitau foi i lenei taeao fou i le usuai mai ma maitauina foi galuega o le Maota i lenei taeao ma le tuuina mai o lenei Tulafono, ia e lagona lava le agaga fiafia ma le agaga faafetai ona e le o nofoai foi le tatou Malo i le silasila mamao pei foi ona saunoa nei le Afioga i le Palemia aua lava le agai i luma o le Matagaluega, aemaise lava o le tasi lenei Matagaluega taua i totonu o le atunuu, aemaise lava o le tautuaina o le atunuu i le faamalosiga o le Tulafono i le Tulafono aemaise foi o le tali atu, tali atu i le manaoga o le atunuu i le faatulai mai i tonu o faafitauli ma mea ua tutupu mai aemaise foi o lenei vaitaimi ua agaigai i luma le alualu o soligatulafono, ia ou te talitonu o le tulaga lea ma se silasila lea i le mataituina i totonu o le Matagaluega, a lelei le Pulega ma le Matagaluega, ou te talitonu o le a foia le tele o faafitauli ma mea e tulai mai. O le mea lea e momoli atu le agaga faafetai i lau Afioga i le Minisita mo le tuuina mai o lenei Tulafono Tau Faaofi i totonu o le Maota.

Ia o lea ua maua ua maua foi le agaga o le Tulafono ia o se...fai mai e tatala le avanoa, tatala le avanoa pumoomoo o lo o i ai nei i le Tulafono aemaise lava le tofiga o le komesina, ina ia ofi mai nisi mafauauga fou po o nisi lagona fou i totonu o le Matagaluega ina ia i ai se suiga ma taumafai ina ia suia ai le tulaga o lo o i ai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

I le vaai ma le maitau, atonu o le tulaga lava lea sa tatau ona silasila mamao i ai le tatou Malo mo le agai i luma aemaise lava o lenei Matagaluega.

I le maitau i ai po o se vaitaimi o le 1970, o lea lava sa tofia mai lē sa Komesina o Leoleo mai Niu Sila o Sir Angus Sharpe le iloa po o lea lava e manatua e le tatou Maota nei i lena foi vaitaimi, e tele ia o le taua na ala ai ona aumai foi lena lea sa avea ma komesina mai Niu Sila. Ia e aumai lenei tamalii ua latalata i le 80 tausaga, a o lona sao i lena taimi, o se sao taua mo le Matagaluega, ia sa tele lava le suiga sa i ai. Ou te talitonu ona o lea ua aumai le Tulafono, ia sa mafai lava ona fai i le taimi i lena Faigamalo i lena vaitaimi ae e lei i ai se Tulafono. O lona uiga, o lo o i ai lava le malosiaga ma le pule faamalumalu o le Faigamalo ina ia silasila totoa pea i ē e talafeagai mo lenei tulaga, aemaise lava lenei tofiga o le tatou Komesina o Leoleo. O le mea lea, leai e le o se mea fou lenei mea i le maitau ma le vaai, leai sa tupu muamua foi ma sa faatino foi i ia foi vaitaimi, o lea lava na silasila i ai le atunuu sa tele le suiga sa tulai mai. E talitonu foi o lenei suiga, tasi lea suiga ou te iloa o le a tele se suiga o le a aumai.

O le agaga lava ou te fia avatu i le taua foi o lenei Tulafono ua aumai, o le vaai lava lea o le Matagaluega i le faatinoina, aemaise lava o le taumafai ina ia faatino po o le proactive po o le taumafai ina ia faatino muamua ia manaoga o le atunuu ina ia faatino, ae aua le faatalitali sei tupu le mea faatoa faatino, proactive. O le agaga lena e taua tele e tatau foi ona taumafai i totonu o Matagaluega o le taumafai e fai auala ina ia faalauiloa ai ina ia foia ai soligatulafono i lo le o atu, ua tupu le solitulafono. O le agaga lena ou te talitonu, e tasi lena agaga taua e tatau ona silasila i ai atonu e aoga foi lenei suiga, ou te talitonu foi o le a tele foi le aoga o le a vaai mamao i tulaga faapena ina ia faamautinoa aua a lelei auala ma lelei ia fesootaiga ma taumafaiga, ou te talitonu foi e faaitiitia foi iina solitulafono. Ia pei o tulaga na i le maitau ma le vaai i ai, e tatau ona silasila i ai aua le agai i luma. I le maitau la i lenei Tulafono, ia ou te talitonu ua taatia tonu lava i le tulaga e tatau ona i ai i le vaai.

Ou te talitonu lau Afioga i le Fofoga Fetalai ma le paia o le Maota ma lau Afioga i le Minisita, ia ua lelei e manaia foi lenei suiga ina ia tatou silasila foi ma vaavaai mo le agai i luma. A o le tulaga lena e lagolagoina le tuuina mai o lenei Tulafono Tau Faaofi. E pau lava lau tilotilo i le Tulafono pei e le o manino mai ia se tulaga foi lea o tausaga retirement, po o le a le taimi e retire ai po o tausaga faatulagaina, aua e mafai ona aumai, pei ona ou taua i le taimi lea na i ai le tamalii lea mai Niu Sila po o ua latalata i le 80 tausaga, ae o lanai a galuega ma le faigaluega o le matua lelei lava. Ia pei o le tilotilo faapena ma le vaavaai faapena, ia e le o manino mai i le tatou Tulafono po o i ai se tulaga faapena. Ae e lagolagoina e lou nei sui usufono le tatou Tulafono Tau Faaofi, faafetai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

**FOFOGA FETALAI:** Malo faafetai saunoa i lau Afioga i le sui usufono mamalu mo Faasaleleaga Nu. 2.

Ia o le a ave muamua le avanoa i le sui usufono mo Faleata Sasae ona o lea sa tulai muamua mai ia ona tuuina atu lea o le avanoa i le sui usufono mo Faleata Sisifo, tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO (Faleata Sasae):** Faafetai i lau Afioga i le Fofoga Fetalai, faamalo atu foi i le Afioga i le Palemia aemaise le paia ma le mamalu o le Kapeneta ma le mamalu o le Palemene.

E muamua ona momoli lau faafetai i le Minisita ma le Matagaluega i lenei Tulafono Tau Faaofi, ma e pei ona silafia foi e le mamalu o le Palemene aemaise le mamalu o le tatou atunuu le taua tele o galuega a leoleo po o alii malu foi o le Malo aua le puipuia o le tatou atunuu, ma o le tele lava o faafitauli o lo o tutupu mai i totonu o le tatou atunuu, tatou te faamoemoe lava i lenei Matagaluega i le faatinoina o lenei faamoemoe.

E i ai nai vaega ou te fia talanoa ai i le Tulafono Tau Faaofi e pei ona faataatia. Muamua, o le filifiliina lea o le Komesina lea pei ona saunoa le Taitai o le Malo, o lea ua faamatuu atu le avanoa i so o se tasi, e le gata i totonu o Samoa aemaise atunuu mamao, ia aemaise e foliga mai e na o le tagata lava sa leoleo. O lea ou te fia malamalama ai lou sui usufono, pe o le mea ua tatala foi le avanoa i tagata foi ia e le o ni tagata Samoa, so o se tagata leoleo i so o se atunuu, ne'i te'i ua sese au po o i ai se vaega i totonu o le Tulafono Autu e mautinoa ai lea vaega, pe o le mea e na o tagata o alo ma fanau po o tama foi o le atunuu o lo o avea ma leoleo i atunuu i fafo e mafai ona apply mai i le vaega lea, o lea lava e faataatia i lalo o le Tulafono ia le aofai o tausaga e mafai ai ona leoleo le tagata ona mafai lea ona aumai sana tusi talosaga e avea ma Komesina. Pau lea o le vaega ou te fia fesili ai, po o le vaega lea e tatala i so o se tagata e aofia ai ma tagata e le o ni tagata Samoa.

O le vaega lona lua i lalo o le Tulafono Tau Faaofi aemaise le vaega lea o le soliga o tiute tauave, o lea e foliga mai e faalua ona faasala ia se tasi o alii malu o le Malo pe a faapea e molia i lalo o le vaega lea. Afai e molia i lalo o le vaega lea ae ave i totonu o le Faamasinoga ae ave e falepuipui, e mafai foi e le Tulafono lea ona faasala lava pe afai e faamaonia i lalo o le Tribunal lea ua sala ua soli e le tagata lea le Tulafono lea. O lau fesili, pe aisea le mea ua fai ai lea vaega o le Tulafono? Afai loa ua molia ave i le Tulafono ave i totonu o le Faamasinoga molia falepuipui, e i ai lou talitonuga o le faasalaga lena ua tataua ona i ai. A o lea e foliga mai i i le vaega o le Tulafono, lea foi a molia lava i totonu o le suesuega a Tribunal a Leoleo, e mafai lava ona molia ai lava i le vaega lena.

O le isi vaega ou te faafesili ai i lau Afioga i totonu o le Tulafono Tau Faaofi lenei, o lea foi e faapea mai i le Tulafono e mafai ona molia na o le Sui Komesina e mafai ona ia molia ia ni solitulafono i totonu o leoleo, ae le mafai la e le Sui Komesina ona molia ia le Komesina.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

O lea la ou te fia malamalama ai, o ai la e molia le Komesina? O le vaega lona lua o lau fesili, e mafai e se isi lava sui alii malu o leoleo ona molia se isi tagata leoleo pe afai ua breach le duty lea i lalo o le Tulafono, aua o lea e sau i le Tulafono, na o le Sui Komesina e mafai ona ia moliaina nisi ua solia Tulafono i lalo o ona tiute tauave? E pei o nai au fesili ia e fia tuuina atu i totonu o lenei Tulafono Tau Faaofi, ae momoli lau faamalo i le Afioga i le Minisita ona o le taua o lenei Tulafono Tau Faaofi, ma le faaaloalo lava.

**FOFOGA FETALAI:** Malo, faafetai saunoa i le sui usufono mamalu. Ia tulai mai le tasi sui usufono mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai i lau Afioga i le Fofoga Fetalai ma le paia o le Palemene o Samoa i lenei taeao fou. O lenei Tulafono Tau Faaofi, ia e tatou te tau faatasi e taua tele ma e ao foi ona fai i ai se manatu.

E muamua ona momoli le faafetai i lau Afioga i le Minisita i le tuuina mai o lenei Tulafono Tau Faaofi. Ae e lei amata lau lauga, e ave foi lau lagolago i lenei Tulafono ona o nai mafuaaga nei. O lea e tatou te talitonu uma, e so o se faalapotopotoga po o aiga, o fea lava mea tatou te i ai, o mea uma lava e tepa taulai i le taitaiga leadership. O iina e tatou te iloa ai ia so o se faalapotopotoga ma so o se sosaiete tatou te i ai o sologa lelei ma lelei, o le lelei o le taitaiga.

E momoli foi lau faafetai i le Ofisa ma le Matagaluega nai uso o lo o galulue ma tuafafine o e sa galulue, e le faigofie le latou galuega, e le faigofie, ae o lo o taumafai aua le saogalemu o Samoa. O aso ia a o ou laitiiti e masani ona faafefefe tatou i leoleo, le leoleo la o le a sau le leoleo, pei o se tagata o se tulaga sa aloaia ma mamalu, a o lea foi ua sui fai mai isi, aua le toe faafefea tamaiti i leoleo a foi o leoleo lau uo. Aua o taimi na a tatou o i le Apia Park, se pe tasi lava pe toalua leoleo e savavali solo ai, you feel secured, e te faalogo atu lava la ua i ai le toafilemu i mea i nai leoleo sa i ai. E le o faapea atu la o faaletonu tulaga o i ai le Matagaluega. O le mea na e le o na ma le laina le tulaga o i ai le fesuiaiga o i ai, ae o mea la ia o lea ua ala ai ona tatou toe matimatia tulaga i le agai i luma o le Matagaluega ona e taua tele.

I le fesuiaiga o i ai, ia e lagolagoina le tulaga o i ai i le faasalalauina o le avanoa, e le faapea o oge tagata ia le Matagaluega i le taimi nei. Ae sa i ai lou manatu e tatala i tua aua le faapitoaugafa foi lea faapea na o e sa leoleo ma e o lo o galulue faa-Leoleo, tatala i tua le avanoa, ia peitai ane, e faigata foi le galuega faa-Leoleo, aua o le Tulafono o lo o i ai, e ao lava e amata mai lalo through the ranks foi lele sau i le faasologa i le Matagaluega mai lava i lalo seia oo i luga, pei o tagata ia o lea e tilotilo i ai le Matagaluega, tagata ua lava le silafia ma le iloa.



Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

O au le isi sui usufono e lauga soo i le Palemene, e le fiafia foi lele i le aumai pea o tagata mai fafo i totonu o Samoa e faauluulu i ai Matagaluega, ua lava tomam iinei localize le tele o avanoa. Peitai ane e eseese Matagaluega, o le Matagaluega leni o Leoleo e tele mea e te faaaogaina pe a tulai mai i le tofi taitai ona avea lea o oe i totonu o aoga foi ia Iunivesite ma tulaga faapena, o le mea e te aoga ma e maua lou tomam i le taimi e faasolosolo mai ai i totonu o le Matagaluega. Ma e i ai le tu faapitoa le culture faapitoa faa-Leoleo, o mea la na e ao i totonu o mea nei. Faafetai o lea ua ou faalogologo i le Matagaluega ma le Afioga i le Minisita ma le Minisita Lagolago, o lea ua tau foufou e fai se Police Academy e aoga ai ma train ai a tatou leoleo. O se mea leni ua leva ona tataua ona fai, talosia ae vave mai se taimi e tulai mai ai se aoga faapitoa faapea e aoga ai a tatou leoleo ina ia lava tapena itu uma i le faatinoga o le galuega. E le gata iinei, ae ia ave i atunuu i fafo e galulue ai ma sue mai ai le tupe.

O le uiga la o lau faamatalaga i le tulaga leni, i lou talitonuga, o nai Matagaluega foi nei a le Samoatel i le taimi foi lea na faasalalau ai, na i ai foi papalagi mai fafo. O le tuutuuga na i ai i le taimi lea, e tasi lava le term e sau ai le papalagi e sau e ao ma vaavaai po o ai nisi o le Matagaluega e mafai ona tauaveina le Matagaluega i le lumanai. O lana uo sa i ai, e sau ma fai le training foi lele, ae uma ane, ua uma le isi papalagi, toe aumai le isi papalagi, toe aumai le isi papalagi, ua defeat ai le mea sa faanaunau i ai i lea vaitaimi. Ou te talitonu e le tataua ona tupu i le Matagaluega o Leoleo pe afai o le a fai se tulaga faapenei.

Na tau alu foi lou manatu i le finagalo faaalua e le sui usufono mo Faasaleleaga Nu.2 lea sa galue muamua, manaia foi tulaga nei ae aumai se tagata ua litaea mai fafo ua matua lava lona tomam ona sau loa lea iinei e galue as a Consultant foi lele e train uma le top management level o i ai, pe o se lua pe tolu tausaga ona fili mai ai lea o se isi e talafeagai i le agai i luma. O lou lava lea manatu na o au e le fai ai, aua o le culture lea faa-leoleo e amata mai lava i lalo scia tau i luga. Po o ai le leoleo fou ua amata, i lona maemaea ma lona tulaga foi lea galue, po o se isi lava Matagaluega, i lou talitonuga, e le umi lava ae lanu i lanu tuai o i ai.

**FOFOGA FETALAI:** Malie le sui usufono se i tuu atu le avanoa i le faauilavea a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e foliga mai e malamalama tele le sui usufono i le culture a leoleo, ona o lea e nanu le sui usufono. Se i e auiliiliina mai le culture lea e te talanoa mai ai? Leaga e tele lava ituaiga culture. Se i e auiliili mai lava le culture lea se i malamalama ai ona o lea ua loloto tele lau oo i le mea lena?

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

**FOFOGA FETALAI:** Ia, se i tulai mai le sui usufono mamalu e fai le faamalamalama o le mataupu sa e saunoa i ai.

**Tofa LEALAILEPULE RIMONI AIAFI:** Sa fai lau appointment ou te fia – e i ai si au mataupu sa ou fia talanoa ai i le Afioga i le Palemia ananafi. Ou te alu atu ua ta le 5, ou te alu atu o la e nofo mai lava si toeaina ma ona laei sa laei i le Fono. Ua ta alofa i ai ou fai atu, “Lau Afioga, o le a ou toe alu ia, fai sina au malologa, ua alu lou aso i le tele o tagata e omai e faatiga lou mafaufau.” O lea la lau Afioga, a toe maua sou avanoa i le 5 i le afiafi, ona ou alu atu lea ta te talatalanoa ma faamatala le uiga o le culture.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, na ou tuua le avanoa i le sui usufono e alu atu ai ma te talatalanoa, a o la e foi ua uma ona ou faatulagaina avanoa mo isi e o atu i le 6, 7, 8, 9, 10, 11, 12. O lea la ua uma ona ou faatulagaina ae alu atu le sui usufono fai mai, “Ua ou alofa atu ia te oe i le toatele o tagata la e faatali i fafo.” Ona ou faataupupula lava lea i le sui usufono. O lona uiga, na mafua ona alu atu le sui usufono e faataunuu le ma appointment, a ua lelava, ona ou fesoasoani loa lea i ai, “Ua e iloa la le sao, a maua loa sou malosi taeao ona e toe sau loa lea.” O la e ua tu i ai le taimi ma te toe feiloai ai nei. Ae le o au na lelava, o ia na lelava. A o au ia – na ou fai atu foi ia te oe, na ou alu atu talu ai nei i le fomai e siaki lou fatu, ua uma le fatu o le leona ae fai mai, “Se o le fatu o le elefane le tata.”

**FOFOGA FETALAI:** O lea e le i talia le culture lea le sui usufono mo Faleata Sisifo e faaauau ai le tatou galuega. Saunoa mai i le culture a leoleo lea sa e taua o lea e faafofoga le Maota.

**Tofa LEALAILEPULE RIMONI AIAFI:** A ou talanoa i le culture lau Afioga, ona faataga mai lea o au e itula ou te lauga ai i mea tau culture.

**FOFOGA FETALAI:** E le sopolia ai tatou Tulafono Tumau le sui usufono mo Faleata Sisifo.

**Tofa LEALAILEPULE RIMONI AIAFI:** Ia ou te le toe tautala i ia mea lau Afioga, ou te manatu ua malamalama. E sao le Afioga i le Palemia, na pau lea o le tagata e talavou le fatu. Ae pei lava ona ou talanoa atu, o nei suiga, o suiga lelei, ma tatou te auaufaatasi tatou te galulue faatasi ma le Afioga i le Minisita ma le Matagaluega ina ia tulai mai i se tulaga lelei i le agai i luma. E le faapea foi e tau – e faamalulu atu i le Matagaluega ma le Afioga i le Minisita, e leai, e le faapea o tau le pua ma lafo atu, e lea i o lea tatou te taumafai ina ia faigofie a tatou galuega mo le agai i luma o le tatou Matagaluega.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Ia, ua lava ia manatu lau Afioga i le Fofoga Fetalai, ae se i i ai lava le ma taimi ma le Afioga i le Palemia ma te talatalanoa ai ona faamatala loa lea ia te ia mea uma. Manuia le Fono.

**FOFOGA FETALAI:** Malo faafetai. Malie lava le – Ia o le a faasolo pea ona taualuga lea i le Afioga i le Taitai o le Itu Agai. Tulai mai lau Afioga i le Sui Taitai o le Itu Agai, ona sosoo ai lea ma se tasi o sui usufono mo Salega, Afioga Afualo Wood Uti Salele.

**Afioga Hon AEAU PENIAMINA LEAVAISEETA (Falealupo):** Lau Afioga i le Fofoga Fetalai ma le mamalu o le Palemene, ou te tulai atu ma le ava e tatau ai, e puupuu lava so matou sao lea e le i avatua auiliili e au uo nei.

Ou te lagolagoina le aumaia o lenei Tulafono Tau Faaofi taua, aemaise foi o le faamalamalamaga a le Afioga i le Palemia. O avanoa, o avanoa, tatala le avanoa. O le mea la ou te fia tuliloaina, lagolagoina, a o le avanoa lea mo iinei, avanoa mo tatou alii leoleo. Aua le aumaia ni tagata mai fafo. Aisea? O mafuaaga nei; muamua, ua ova i le 50 tausaga o tatou tutoatasi, ua tatau ona lava taoso. O lea o lo o tatagi pea i le faalogo a tatou le tala i tocaiina foi nei sa savalivali i uta i le vaofefe, lea ua 50 tausaga, ua tatau. O le fesili; e i ai le tala a le Tusi Oti a le matou Ekalesia, “E fia fai moa uma tama.” Talofa i le mamalu o le atunuu o e o lo o tauaveina le taleni lenei a leoleo. E le faigata, e toatele. E tasi lava le latou aim, o tatou uma lava, o le fia oo i luga, ae tasi foi lava luga lea. O le mea la lea e taua ai tele. O le fesili o lea o lo o i ai, sa lava se avanoa sa aoaoina ai i latou e le Malo mo le tuliloaina o le mea lea? Tainane toalima, toaono i latou ua pasi atoatoa ma tapena sauniuni i le mea lea. O le galuega lena a le Malo, po o lava. Silasila po o lava, ia lava taoso ona faigofie ai lea ma ave ai ma le incentive e faapea, ou te iloa a tai tolu tausaga ua manaia, lua, tolu. A tolu loa ua gata, ae a tolu loa ua maua e se tagata le Komesina, ia matua faeaina ma ave i ai se faamanuiaga tele. O lona uiga, i se competitive thing mo tagata uma, ae taua lava iinei, lea o lo o aumai i se vaega o le Tulafono Tau Faaofi nisi mai fafo.

O le agaga lena ou te tulai atu ai, ou te le lagolagoina lea vaega. E pei lava ona ou fai atu, o le mamalu o le atunuu lea, so o se matata lava, so o se matata, e leai lava ma se isi, especially the specific one, se profession po o ai. O le auga lava o luga, mo le mamalu o le atunuu. Ma ou te talitonu, e leai lava ma se isi o le Matagaluega o Leoleo e le o fia oo i ai. O le avanoa la lea ua taatia mai, faafetai tele lava i lau Afioga i le Palemia, a o le avanoa, ia fai i le lotoifale, leaga ua tatou matua.

O le matou toe fesoasoani atu lea i lenei taeao. Ia manuia le Fono.

**FOFOGA FETALAI:** Malo faafetai saunoa i lau Afioga i le Sui Taitai o le Itu Agai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Se i tuu atu le avanoa lea i se tasi o sui usufono mo Salega, Afioga Afualo Wood Uti Salele ona sosoo lea ma le sui usufono mo Gagaemauga Nu.2.

Afioga AFUALO WOOD UTI SALELE (Salega): Faafetai i lau Afioga i le Fofoga Fetalai. E le tuuaunoaina foi e Salega le Tulafono Tau Faaofi taua lea e folau ae tatau ona togi sa matou maa ona o le taua, e momoli atu ai le matou faafetai i le Afioga i le Minisita mo Leoleo.

I le mau a le aufai-Evagelia, fai mai ua alu le po atoa o fagogota le ausoo, fagogota ae oo i le ao e leai ma se i'a, ua oo lava ina faasea i le Alii i le le maua o se i'a. Ona fetalai lea o le Alii, "Lafu le upega i le loloto, tuutuu i le loloto." Ia, ona faapena lea ona fai ma ua usitaia le Afioga, fai mai ua matuai fiu e ao le upega.

Faafetai i lau Afioga i le Minisita ona o le taua ia o le Teuteuga lea ua i lumamea ona o le musumusuga a le Agaga lea ua mafai ai ona teuteu. E le faapea la o le musumusuga ua faatauagavale i ai pe ua taufaatauvaaina ai tamalii foi ma failauga o lea ua ofo lo latou ola e auauna e ala i le Matagaluega o Leoleo, a o lea ua tatala le tofa ma le faautautaga ua lafo le upega e aoao mai po o fea le laui'a e sili ona lelei mafai ai ona faatino le fuafuaga uma lea e manao i ai le tatou Fono lenei, aemaise le Afioga i le Palemia ma le Kapeneta.

O le agaga lea e momoli atu ai le faafetai a Salega i le tulaga lava ia i le fesoasoani, ina ia mautinoa ua i ai ni manulauti aua o le auaunaga lava ia, o se auaunaga e malu ai le atunuu, o se auaunaga e tua i ai tatou uma lava. Afai foi la e vave faatino le faatinoga o auaunaga e amata mai lava i e o lo o tulai i le foe seia oo lava i e faatoa amata, ona fesiligia loa lea po o fea o i ai. E pei lava o le tala foi lea i le tina Salemuliaga lea na fasia lana tama, na tagi aueue po o fea o i ai Tuato ma Tuitolovaa e faasolo ifo lava i le Aiga Salemuliaga. E faapena tonu lava la le agaga o le Tulafono Tau Faaofi lenei. Ou te matua faafetaia lava ma e lagolago e Salega ina ia mautinoa lelei o sagatonu le sa o le Matagaluega, ona ua le masino le ao ma le po. O au la ia i isi taimi ou te le fia tilotilo i ai i le Televise ma nusipepa i le mau faamatalaga nei e aumai ona e tatou te lagona uma e tatou o sui usufono o le Palemene, po o le a se vaega e ono aafia, tatou te lagona uma lava, aemaise lava i tatou nei ua tofia tatou te omai i inei e tapenapena ma faasoasoa Tulafono mo le manuia o le atunuu. Ae afai la o le tulaga lea ua taoto mai faapea ma faapea ma faapea ai lava a o lea ua maua le auala lea ona o le musumusuga a le Agaga, ia toe faafoi le viiga i le Alii.

O le vaega lona lua lau Afioga i le Minisita o Leoleo, po o aafia ai ma le Komesina o Falepuipui. Afai o la e ua tatala foi, malo, faamalo. Ae afai e leai, ia e aoga foi ona silasila i ai ina ia mautinoa ai ua ogatasi uma fuafuaga alualu i luma a lau Matagaluega. Ia o lau soso atu lea, o se sao lea o Salega i lenei toe teuteuina o le Tulafono Tau Faaofi. Ae ia manuia lava ma faamanuia mai le Atua.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

**FOFOGA FETALAI:** Malo faafetai saunoa. Faafetai mo le sao o le tatou itumalo. Ia lafo atu i le sui usufono mo Gagaemauga Nu.2.

**Tofa LEVAOPOLO TALATONU (Gagaemauga Nu.2):** Faafetai tele i lau Afioga i le Fofoga Fetalai. E puupuu lava foi se manatu vaivai e tusa ai ma leni Tulafono Tau Faaofi. E taua tele foi leni Tulafono Tau Faaofi. E lagolagoina e lou sui usufono le Tulafono Tau Faaofi leni, o se Tulafono Tau Faaofi foi ua leva ona faataoto i totonu o le tatou Palemene ina ia solosolo lelei le tulaga o le faatinoina o galuega a le tatou Matagaluega, le malu o le Malo.

Ae na pau lava se vala lea lau Afioga i le Fofoga Fetalai e le auai ai lou sui usufono, o le tulaga lea o le tuuavanoa o le avanoa o le Komesina i atunuu i fafo. E pei o lea e tatala le avanoa, e manaia pe ana faapea na o tagatanuu o Samoa o lo o alaala ma papaaao i atunuu i fafo, peitai, o lea e tatala le avanoa. E toe ave lou mafaufau lau Afioga i le Fofoga Fetalai i tua i le vaitaimi o le taumafaiga o le tutoatasi o le tatou atunuu, ma ou te talitonu lava o le sini autu ma le faamoemoe o tuua i lena vaitaimi, ia pulea lava e tatou a tatou mea fai i totonu o le atunuu. E amata mai foi i ina o papalagi sa leoleo i lena vaitaimi. Ona tatou tulimatai loa lea o le faamoemoe o le Malo e pei ona i ai ina ia ave le faamuamua i o tatou lava tagata, peitai ane, i le tulai mai o le Tulafono Tau Faaofi leni e pei e foliga mai o le a toe solomuli i tua lo tatou sa. O le upu moni lena, a o lau fautuaga i Minisita ma le Malo, se i silasila lava i le tulaga lea. Afai ua silafia e le Malo ma lau Afioga i le Minisita ua leai se isi e agavaa i totonu lava o Samoa. O le fesili la pe aisea ua mafua ai? E ao lava la ona faaleleia. Ou te talitonu afai o le le lava o toleniga ma aoaoga i le mamalu o le Ofisa o Leoleo ua ala ai, e tataua la ona saili mai se isi i totonu o lo tatou Ofisa, o mea la na e tataua ona faaleleia. Aua o le isi mea e aupito sili ona popole i ai lou mafaufau, a Komesina mai nei se papalagi, e faapefea ona alu i ai se loomatua i tua i se mataupu matuia ina ia malamalama ma fofu se faafitauli i ni mea tau tulafono? O popolega na lau Afioga i le Fofoga Fetalai e faauma atu ai sa matou tala ma le agaga faaaloalo.

**FOFOGA FETALAI:** Malo faafetai. O le a lafo i lea Itu o le Maota a o le a tamuli lau Afioga i le Taitai o le Itu Agai.

Tulai mai le sui usufono mo Faasaleleaga Nu.4, ona sosoo ai lea ma le sui usufono mo Sagaga le Usoga.

**Afioga PESETA VAIFOU TEVAGA (Faasaleleaga Nu.4):** E momoli atu le faafetai i lau Afioga i le Fofoga Fetalai mo le avanoa.

E muamua lava ona faafoi le viiga ma le faafetai i le Atua i leni taeao fou. E manatu leni sui usufono ona o le taua o leni Tulafono Tau Faaofi o lea e momoli ai le faamalo ma le faafetai i lau Afioga i le Minisita ma le Matagaluega i leni Tulafono Tau Faaofi ua faataatia mai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

E tasi lenei Tulafono e ese le faatauaina e lou nei sui usufono pe a ou toe tau tomanatu i le tele o tausaga sa ou galue ai i le Matagaluega lenei ma ou te masalo e fitu tausaga sa ou tautua ai. E pei foi ona taua e se tasi o sui usufono mamalu, sa galue se tasi o alii mai fafo ma sa avea ma Komesina le Susuga ia Angus Sharpe, ma o ia foi lea na amata ai ona ou galue i le Matagaluega lea. O le filifiliga o lenei alii, sa filifili i le tomai ma le agavaa. E le i faia se filifiliga ona e faapea o ia o se tagata sa galue o se loia po o se faamasino, a o ia sa avea ma alii leoleo o le Malo o Niu Sila. Ona sosoo mai ai lea ma le Tofa Lavea Unasa Lio, sosoo mai ai ma le Susuga Sonny Schuster ma le Tofa Galuvao.

O le matau atu i le vaitaimi lea sa matua lelei lava le faatinoina o lenei Matagaluega. Sa tau leai ni faafitauli e pei o le tulaga lea ua tulai mai nei i totonu o le Matagaluega. O lea ua aumai nisi o finagalo o sui usufono mamalu e tetee ai i le filifilia o nisi mai fafo, a o lou lava manatu i le tulaga lea, e tatau ona toe silasila i le taua o lenei avanoa po o le tulaga lenei o le Komesina o Leoleo. E tatau ona tatou silasila i le tagata e lava le tomai ma le agavaa. O lea tatou te manatu i le tautua a nai o tatou tagata o lo o i ai nei ma o lea foi ua tatou vaai i tulaga ia e tutupu mai nei. O le tele foi o taimi e saunoa foi nisi o sui usufono mamalu ina ia ave le faamuamua i o tatou tagata. Ou te auai foi i le tulaga lea, ae ona o le tulaga lea ua tulai mai ma ua fai ai lava sina matuia, o lou la manatu i lea itu, e tatau ona tilotilo i le e agavaa ma ia ave le faamuamua i le sa galue i le Matagaluega o Leoleo. E le gata i leoleo mai Niu Sila ma Ausetalia, ae tasi foi lea faataitaiga lelei mo alii ma tamaitai leoleo o lo o galulue i totonu o le Matagaluega.

O lea sa saunoa nisi o sui usufono e faapea e tatau ona fai se aoga a leoleo. Mo le silafia foi e sui usufono mamalu, o le taimi lava e filifilia ai oe e avea ma leoleo, o la e i ai le aoga a leoleo i totonu o le Matagaluega. E te i ai loa i totonu po o le tausaga atoa avea loa oe ma cadet po o le leoleo faataitai. O i ina e te ulufale muamua i ai i totonu o le Matagaluega lea e te tautua ai faa-leoleo, e auai loa i aoaoga faa-leoleo ma faamamalu ona tulafono uma. O le agaga la ia te au, o le taua ia o le filifiliga o se sa leoleo e avea ma Komesina o Leoleo. Afai e filifili o se tasi mai fafo atu o le atunuu po o totonu foi o le atunuu, e taua foi ia te au.

E pei o le agaga lea ua ou tulai atu ai ma lou faaaloalo lava ou te matua lagolagoina le Tulafono Tau Faaofi. Ma lou faaaloalo lava.

**FOFOGA FETALAI:** Malo, faafetai lagolago i le Tulafono Tau Faaofi. Tulai mai le sui usufono mo Sagaga le Usoga ona tulai mai ai lea o isi sui usufono.

**Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga):** Faafetai i lau Afioga i le Fofoga Fetalai mo le avanoa.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

E faatalofa aloaia atu foi i lau Afioga i le Fofoga Fetalai , lau Afioga i le Palemia ma le Kapeneta ma sui usufono mamalu uma o le Maota aemaise o le faafofoga mai a Samoa ia Tumua ma Pule, Ituau ma Alataua, Aiga i le Tai ma le Vaa o Fonoti. Ou te tulai atu foi e fai se sao o Sagaga le Usoga i lenei taeao fou i le alofa ma le agalelei o le Atua.

Faafetai i le Afioga i le Minisita e tusa ai ma le Tulafono Tau Faaofi ua faataatia nei i totonu o le Maota. E momoli atu ai le faafetai ma e lagolagoina e lou nei sui usufono le tulaga ua i ai. E lagolagoina foi e lou nei sui usufono tulaga uma i totonu o le Tulafono Tau Faaofi aua o lea lava e maua le avanoa e o tatou tagata.

Ona pau lava le suiga lea e i ai o nisi tagata ua avanoa po o tagata mai fafo. O le mafuaaga o lou lagolagoina o tagata mai fafo ona e mamafa ia te au le mea lea o le conflict of interest. O se faamai lea o lea e tupu i totonu o galuega o le conflict of interest - o le feteenai o le fai ma le faamaoni o tiute ma tulaga e tataua ona i ai. E oo foi i le tulaga i faamasinoga, e finau mai foi faamasino ua uma ona tauto ma tulaga faapena, ae i ai lava le natura faale tagata e faaono lepetia ai le faamaoni.

Ou te tautala i luga i mea ua uma ona tutupu ma lou foi experience i mea ua uma ona tutupu i nai mataupu e tuuina atu i le Ofisa o Leoleo ma isi foi Matagaluega. E matua fesiligia ai lava e lou nei tagata le tulaga o le faamaoni i le faatinoga o galuega. E le faapea o faapea mai le Tulafono Tau Faaofi o le a leai se avanoa o nai o tatou tagata. O lea lava e maua aua a faapea e agavaa se tama fanau a Samoa, o le a le mea o le a le filifilia ai?

E fia avea foi le avanoa lenei ou te faafetai atu ai i e o lo o galulue i totonu o le Matagaluega a Leoleo ma Falepuipui. Faafetai i a outou galuega aua e le faigofie galuega o lo o feagai ma outou i mea e tulai mai i lea taimi ma lea taimi. E faafetai tele mo le auaunaga faa-leoleo o lo o outou faatinoina. E le faapea o le a aveesea ai le mamalu ma le lagolago atu i tama fanau, ae ao lava ona silasila le Malo i tulaga ia i le conflict of interest.

O lo o i ai foi isi Matagaluega o le a ou le taua, e tataua foi ona silasila i ai le Malo e pei o tulaga tau faamasinoga. E tataua lava ona silasila lelei i ai le Malo pe e le tataua ona avatu foi le avanoa i tagata i fafo ina ia foia lava le faafitauli lea. O lea tatou te talanoa i le transparency ma le accountability ina ia faamaoni ona fai a tatou galuega. E le faapea la e le o avatua se avanoa i o tatou tagata aua o lea lava e avatu le avanoa i nai o tatou tagata, ae e tataua lava ona foia le faamai lea ua amata ona tulai mai. Aua foi lau Afioga i le Fofoga Fetalai, e le faapea a Komesina se Samoa ona faapea lea o le a leai ni ona faafitauli.

O se faataitaiga, a manava i le afiafi ona o lea i le talanoaga o se faaipoipoga, po o se talanoaga o se maliu. A o le o lo o molia o lo o saofai ai i totonu o lea aiga e tasi.

**Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua**

A faapefea la ona le maua le conflict of interest i ina? Ai o se tagata e le malamalama ona le musumusu lea i le Komesina o Leoleo o le tagata o lona aiga, “Alofa mai i lou faafitauli lea ua tupu, ia alofa ane i le faafitauli o si ou atalii lea ua tupu.” E pei o le mea lena e tatau foi ona tilotilo i le fua po o fea le mea e taua, pe faaalu ai pea faapea pe ua tatau ona i ai se suiga? Pe tatou te alu ai pea i le mea lea e i ai, tulou lava le faafofoga mai a Samoa, ona o lo tatou naunau i a tatou tama fanau? A o lea e afaina ai le lautele o le atunuu? Aua a aiga ma fai le amio lea, e tele le faaletonu.

E pei o le agaga lena ae faafetai tele i le Afioga i le Minisita, faafetai i le Malo ona ua ae foi se tofa i le tuuina mai o lenei Tulafono Tau Faaofi taua i totonu o le Palemene leni ma e lagolagoina e lou nei sui usufono le Tulafono Tau Faaofi. Faafetai i lau Afioga i le Fofoga Fetalai mo le avanoa.

**FOFOGA FETALAI: Faafetai saunooa i le sui usufono mamalu.**

**O le a tuu atu le avanoa i le sui usufono mo Aana Alofi Nu.3 e te tulai mai.**

**Afioga TOEOLESULUSULU CEDRIC POSE SALESA SCHUSTER (Aana Alofi Nu.3):** Faafetai lava i lau Afioga i le Fofoga Fetalai mo le avanoa. E fia avea foi lenei itula e faamau ai foi le lagolago a leni sui usufono i le Tulafono Tau Faaofi ua faapea ona faataoto mai. E faamalo foi i lau Afioga i le Minisita i le tulaga o le faanatinati, o lea e avatu ai foi le lagolago a leni sui usufono ona e taua le vaega o lo o faapea ona manaomia. Ona pau lea lau Afioga i le Fofoga Fetalai na o nai moomooga pe afai i se taimi o i luma ae toe tagai le Matagaluega aemaise foi i latou e tusia Tulafono i nisi o vaega e toe tagatagai i ai, atonu e faaono mafai ona faaleleia atili ai le vaega lea o le Tulafono o lo o i ai nei, a o le taatiaga lau Afioga i le Fofoga Fetalai e lagolagoina atoa.

E pei ona ou tau faailoa atu lau Afioga i le Fofoga Fetalai, o se vaega taua e pei ona taua foi e le tóatele o sui usufono, o le faanaunautaiga lava ia maua mai i totonu i alo ma fanau a lo tatou atunuu ona o latou faaauauina le umia pea o lea avanoa. Atonu o lo o i ai foi nisi i totonu o le Matagaluega i leni taimi ma le lumanai foi latou te mafaia ona tauaveina lea tulaga. O le faanaunautaiga la lau Afioga i le Fofoga Fetalai, afai o lo tatou naunautaiga ia faatumau pea le lelei o alo ma fanau a Samoa ina ia faatauaina nisi o aoaoga ina ia o atu i fafo ma faalauteleina lo latou tomai, ma aumai foi nisi o potu mai atunuu i fafo e faufau ai lo tatou atunuu. Lau Afioga i le Fofoga Fetalai e pei lava ona faaalua e nisi, e auai foi lou nei sui usufono i se tasi o vaega taua i lau lea vaai i ai i le va fealoai lea faa-Samoa. E faigata foi ia i latou mai fafo aemaise lava papalagi ma i latou e le masani i la tatou aganuu, aua o le ava fatafata lava a si o tatou atunuu e mafai ona soalaupule ai le tele o vaega e fia faatinoina.



Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Lau Afioga e tasi se vaega ai ua maca ona silasila i ai le Pulega aemaise foi le Ofisa o le Loia Sili i le tapenaina o le Tulafono, aemaise lava i sui ia e mafai ona talosaga atu i le Komesina. Ae o lou soso atu lau Afioga i le Fofoga Fetalai, pe ua ctagai le Matagaluega e le gata o tagata leoleo, a o nisi foi o i latou o faapea ona i ai, le vaega foi lea o le militeri ona o nisi foi o atunuu e i ai i latou mai le army, e i ai o latou experience, o coast-guard, o i latou o lo o faigaluega foi i isi atunuu, o le navy. O i latou ia o lea e mafai ona oo mai i totonu i le Komesina o isi atunuu i vaega lava faa-leoleo. Pe ua tagai i ai pe ua uma ona iloilo, ae afai e le i oo i ai, ia o se talosaga lea e toe tagai i ai pe mafai foi aua e i ai le talitonuga o le tele foi o nisi o atunuu o lo o mafai ona oo mai i latou nei e i ai latou background i mea lava tau law enforcement, atonu foi e maitauina foi le tele o tatou leoleo o lo o faapea ona o atu e fai training ma i latou o lo o i ai, e le gata o militeri i Ausetalia, o Amerika ma Niu Sila ma nisi o atunuu.

Lau Afioga i le Fofoga Fetalai, o se lagona mulimuli i le taatiaga o lo o i ai, o le talosaga afai e faatinoina lenei vaega o le Tulafono Tau Faaofi, e ioeina foi e lou nei sui usufono ia tatou tagai pea i tatou alo ma fanau. Afai foi e i ai nisi o tagata mai fafo i papalagi ma nisi atunuu e talosaga mai, ia seu silasila ona e i ai le talitonuga o nisi foi o latou nei e aumai e matua lelei credentials ae le o omai e apalai mai e fia manao e sau e fai se galuega lelei mo Samoa, ae o lo o latou tilotilo i o latou atunuu. Mo se faataitaiga e i ai se isi e sau e le o matua tele, ae faaoga Samoa as a stepping stone ia foi atu ai i lona atunuu, ia faigofie ona Komesina o Leoleo i lo latou atunuu. A ia seu silasila i ai i vaega ia ina ia aua ne i faamuamua tele foi le credentials, ae o le a foi le tracking a lea foi ituaiga tagata. E i ai la sau vaavaai foi ia i latou e le o toe i ai se aspiration o le faanaunautaga o lo latou apalai mai o le faaleleia lea o le tatou atunuu.

Na pau lea o se fesoasoani lau Afioga i le Fofoga Fetalai.

**FOFOGA FETALAI:** Malo. Faafetai fesoasoani i lau Afioga i le sui usufono i le tatou mataupu.

Ia malie o lea e i ai nai sui usufono e toalua ia e totoe mai i lea Itu o le Maota. Tulai lau Afioga i le sui usufono mamalu mo le au Palota Taitoatasi, Afioga Maualaivao Pat Ah Him.

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Malie le sui usufono mo le au Palota Taitoatasi se i tuu atu le avanoa i le saunoaga a le Taitai o le Itu Agai.

**Afioga Hon Palusalua Faapo II:** Lau Afioga sa ou manao ou te fia lauga i le mataupu lenei, a o le Tulafono Tau Faaofi o lo o i le tulaga faanatinati.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

A o lea ou te maitau atu o le Tulafono Tau Faaofi o le Tulafono Tau Faaofi a le Itu le la, a o lea e tosotoso ai le tatou galuega, a o lea e faanatinati le Tulafono Tau Faaofi. O lea ua uma ona sausaunoa lenei Itu. E pei o tulaga na o lea e tulai atu ai ma le agaga faaaloalo.

**FOFOGA FETALAI:** Ia malie lau Afioga i le Taitai o le Itu Agai, e tatao pea i le moa o le ala. Pe faanatinati, ae le mafai ona tuua ai avanoa o finagalo o sui usufono. O se mea manaia lenei taeao o lou tulai mai e faanatinati le tatou galuega. Ae a i ai se tagata e aupito sili ona manao e tosotoso le tatou galuega, o lau Afioga i le Taitai o le Itu Agai. Viia le Alii i lou finagalo i lenei aso, ae o le a faasolo pea, leaga e taua le Tulafono Tau Faaofi, ma e le na ma le laina o la e faafogafoga mai le atunuu. E le avefa foi le tulaga faanatinati e omia ai faaniualeale finagalo o sui usufono o lo o faaalua ona o manatu, o lea foi ua toetiiti lava uma le tou Itu lau Afioga i le Taitai o le Itu Agai ona tuu atu i ai avanoa. Ia se i lafo le avanoa se i tata lea Itu ona tali ai lea o le Sao Fetalai.

Tulai mai se tasi o sui usufono mo le au Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM (Palota Taitoatasi):** Faafetai i lau Afioga i le Fofoga Fetalai. E faatalofa atu i le paia o le Maota i lau Afioga i le Fofoga Fetalai faapea foi le Palemia, Afioga i Minisita tainane foi le mamalu i sui usufono o le Palemene.

Ua ou tu atu ae ua tau faateia au, pei e ese, sa ou tau faapea - malo faafetai i lau Afioga i le Fofoga Fetalai. E ese le folau malu o le taeao aemaise le aso ananafi e oo mai i lenei taeao. Ou te talitonu o le manatu o le Taitai o le Itu Agai, ai ni sui usufono nofonono lea e omai e faalogologo ma... Maumau pe ana faapea sa leoleo muamua, ae ui i lea, o le a ou le tautala i ai, leaga o lea ua ou tau iloa o le a amata foi ona faavevesi le tatou Fono, a o lea sa ou manatu e ese le manaia, ou te fia auai i ni faalapotopotoga vacatu le paia o le Maota, e faatupu filemu tagata. E ui i lea, ou te.....

Lau Afioga i le Fofoga Fetalai, e muamua ona ou faafetai i le Afioga i le Minisita i se Tulafono Tau Faaofi taua lenei ua sausaunoa foi i ai le tatou Maota. O le mea muamua ia te au, o le Tulafono Tau Faaofi ua i ai le avanoa, ma ou te talitonu foi o le tatou Malo, o le Malo mo tagata, e faamuamua o tatou tagata. Ma ou te talitonu foi i le tulaga lea, a faapea mai ou te lagolagoina le Tulafono Tau Faaofi ona ua ou le manatu i o tatou tagata, ia e sese lea manatu. Ioe. Tatou te tilotilo agai i se mea silisili ona lelei. Aua o le tulaga o le Matagaluega o Leoleo ma lenei galuega, e taumate le soifua, ioe, e lamatia le galuega. Ma ou te talitonu, tatou te vaai i se mea e silisili ona atoatoa e toafimalie ai lou soifua ma lo matou ola. Ioe. A faapea e saili iinei i le tatou atunuu se Komesina o Leoleo ae ua siliga tali i seu, a lea e i ai le avanoa. Ae ou te talitonu e le faapena le tatou Malo.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Ou te talitonu lava e faamuamua ona vaavaai i le agavaa ma le taua o le fita o tatou tagata i lea foi vaega o le auunaga faa-leoleo. Ma ou te lagolagoina le Tulafono Tau Faaofi lea ina ia maua le avanoa o tatou tagata mai fafo po o nisi foi aua ua tatou vaavaai i ai i le taimi nei, a tatou fia maua le fesoasoani i le tomai ma le aoaoina i totonu o le atunuu, tatou te saili lava i fafo le mea e sili ona tatou moomia. O lona uiga, you don't deny lou lava right for a better firm security of life. Ioe. O lona uiga, e aveese ai foi le masalosalo, aua e leai lava ma se isi o tatou e le masalosalo, faapea; ia leaga foi e tau le Komesina ia Pai. Ae ou te talitonu lava ua umi se taimi o faapea ona sologa lelei mai le Matagaluega o Leoleo, o lo o faapena lava ona tulai mai se tatou tama fanau e tauaveina lea tofiga. Ma ou te talitonu e faapena foi le agaga i lou lava vaavaai ou te manao e ave le faamuamua i o tatou tagata. A leai ua le maua se isi, e faapena ona maua le avanoa. O la e i ai le avanoa taua lea e mafai ai ona tatou maua le atoatoa o le tatou faamoemoe.

O lona lua o lau tautalaga lau Afioga i le Fofoga Fetalai, o le saililiga lea o amio le talafeagai i totonu o le Matagaluega o Leoleo. O lau lava fautuaga faitoatasi, e manaia lava pe a tuu pea i le Komesina o Sulufaiga, e manaia e aveese ai foi nisi lagona vaivai o tatou i le tulaga lea.

Ou te faapea atu ai, o le a le faaumia sau faamatalaga ona e faitio mai foi le la Itu faapea ua toe tautala atu foi matou nei, ae leai, o tatou uma lava o sui usufono tatou te omai iinei e faaali o tatou lagona. O le a oti le lagona, vaeatu lava le mamalu, ae faapefea ona fai? O ai a ave i ai? E lelei le tou faafofoga mai tou te malamalama ai foi i nisi mea taua.

Ia o le lagona lena ae momoli atu le faafetai tele i lau Afioga i le Minisita mo lenei Tulafono Tau Faaofi, ae le faaitiitia ai foi le faafetai i le Matagaluega i o outou tiute fai taua, e taua mo matou, o matou uma lava, o le atunuu atoa, aua tatou te feoi ae tatou te malu i le Matagaluega o Leoleo.

Lau Afioga i le Fofoga Fetalai, faafetai mo le avanoa. Ia manuia le Fono.

**FOFOGA FETALAI:** Malo faafetai i le saunoaga manino a lau Afioga i le sui usufono mo Samoa Aoa. Masalo leaga o lou itumalo lea e aupito sili lava ona tigaina ai le Matagaluega. O le taulaga lava lea e tele ina tutupu ai faafitauli ae faafetai mo lou sao taua.

Ia, tulai maia le sui usufono mo Falelatai ma Samatau, lau Afioga i le Tama Tauaana.

**Afioga TAEFU LEMI (Falelatai ma Samatau):** Faafetai i lau Afioga i le Fofoga Fetalai. E leai se manatu e fai se upu i le tatou Tulafono Tau Faaofi, peitai e i ai nisi o vaega ua ou manatu e taua ae le i taua e nisi sui usufono ua ala ai ona talosagaina se avanoa.

Lau Afioga i le Fofoga Fetalai, e momoli lau faafetai i le Minisita e ona le Tulafono Tau Faaofi.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

E i ai nai suiga lelei ua maitauina e lou sui usufono i le tatou Matagaluega. O aso ia, e te i lava ua fealuai mai le leoleo ua fai laei ma toniga ae le i iloga lava pe faapefea ona oo i lea tulaga.

O le taimi lenei, faafetai lava i lau Afioga i le Minisita, e ese le manaia o le faatinoga la e ua faatino ai, e fai tatou aoga ona faauu faatasi lea, maitau atu le atunuu i ala-ata ma tulaga faapena, ua lava le tapenaga, o tapenaga ia sa le maua e le atunuu i ia aso. O itu lelei ia lau Afioga i le Minisita, ae o le faaeteetega lava lau Afioga i le Minisita, ua manaia lava le aumaiga ma le filifiliga o tatou tamaitai ma alii leoleo, ae ina ia faaauau pea le atinae ma le aoaoina ina ia tino mai ai le tulaga lea tatou te moomia.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Malie lava le sui usufono o lo o saunoa o le a se mea.....

Tofa Lealailepule Rimoni Aiafi: E leaga o le tuuaiga a le sui usufono mamalu e fai lava si malosi e faapea e te'i lava ua feoi mai ma ofu leoleo ae...

FOFOGA FETALAI: Malie le sui usufono o lea e manino le Nofoa e le i taua.....

Tofa Lealailepule Rimoni Aiafi: E le lelei foi i le faalogologo atu a lou sui usufono, e tatau ona faasao le saunoaga a le sui usufono mamalu.

FOFOGA FETALAI: Ia, o lea ua maua e le o i ai se tuuaiga mamafa i lea itu e le o taua faapea o ai ua leoleo, pe o se taisi ma se moa lena e te tau faamalamalamaina mai. Ae o lo o manino le saunoaga a le sui usufono, e leai se tulaga faapena, e le o i ai se tulaga, o lea lava o lo o manino le faasaoga i le mea lea e tau faamalamalama atu.

Tulai mai le sui usufono e faaauau le saunoaga.

Afioga TAEFU LEMI: Faafetai lava i lau Afioga i le Fofoga Fetalai. O le tulaga lea ua i ai nei, ua lelei ona faatino aoaoga a alii ma tamaitai leoleo a o le i agai atu ina leoleo. O se faiga lea sa fai ai i aso ua tuanai sa lelei lava faiga na fai ae ua ou talitonu ua sili ona manaia le faiga lea ua i ai i le taimi nei. Ae pei ona ou taua lau Afioga i le Minisita e ou le Tulafono Tau Faaofi, na pau lea o le faaeteetega ia te au, ina ia faaauau pea le aoaoina o tamaiti nei, tama ma teine ma le Malu o le Malo i tu ma aga faa-leoleo ma le faamaoni lava ia tauave.

Ona ou faafetai ai lea i le Tulafono Tau Faaofi lea lau Afioga i le Minisita, aua o lea ua aumai le Tulafono Tau Faaofi, ou te talitonu lava o se Tulafono Tau Faaofi ua leva ona tatau ona i ai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Sa faapea lava ita o se mea o lo o sau ai lava i le tatou Faavae ma tulaga faapena, ae faafetai o lea ua ae se finagalo i lau Afioga ma le Matagaluega ma le Malo ia fai lea teuteuga ina ia mautinoa o le manuia ma le lelei i le faatinoga o galuega, e amata mai lava i luga, e amata mai luga ona faasolo mai lea i lalo ona ofi atu ai lea o nai alo ma fanau lea ua faatoa toai mai e auauna i le Matagaluega e auala i lea vaega.

O le tulaga lea e momoli atu ai le agaga faafetai tele i lau Afioga. Na pau lava se fautuaga i lau Afioga i le Minisita, e i ai lava le pese a le tatou Malo lea e faifaipea, transparency, accountability ma le good governance. E i ai lava lou manatu, toetiiti lava maua lelei e le Matagaluega le pese lena. A faapea e alualu pea i luma le lelei faatinoga o galuega e ala i le tatou Tulafono Tau Faaofi ua toai mai nei, ia, ina ia mautinoa le maua lelei o le pese lena. Ia au lava ia ma lau maitau lau Afioga i le Minisita, o le transparency o le faa-Samoa ia malamalama, accountability a faa-Samoa o lona uiga ia malamalama, good governance a faa-Samoa o lona uiga o Faigamalo lelei. Ona pau lava na o upu. E le aumaia loa i lumamea le malamalama loa se mea, ona oia loa lea o mea na e tolu lau Afioga i le Minisita.

Ma le manatu mulimuli, e tau lava ina silasila ane i le tatou Tulafono aua o lea ua tatou taua ACEOs po o le vaega lena o Ofisa Sili Lagolago, a o lea e aumai o le Komesina Fesoasoano. Ou te masalo o le Komesina Lagolago e sili atu ona talafeagai i le matou maitau.

O le fesoasoani atu lea lau Afioga i le Fofoga Fetalai i lenei mataupu

**FOFOGA FETALAI:** Malo faafetai. O le sui usufono mulimuli mai Salafai.

Tulai mai lau Afioga i le sui usufono mamalu mo Faasaleleaga Nu 3.

**Tofa TUILEUTU ALAVAA VOI (Faasaleleaga Nu.3):** Faafetai ua uma ona sua le tuli e pei o le mavaega nai Pulu, ae foi i lagi e pei o le upega ua faaee i le talitali le galuega e pei ona molia ai laau i Fogaa.

Faafetai i le Atua i Lona alofa ma Lona agalelei e pei foi ona lagi maualuga i lenei taeao ma lenei aso. O le upu a le atunuu i faagatama i le tai, “A see le vaa tu le foe, ona vaai lea i ona tua.”

Lau Afioga i le Fofoga Fetalai faapea le mamalu o le Maota, lau Afioga i le Minisita faapea lau Afioga i le Palemia ma le Aiga Kapeneta ma le mamalu i sui usufono o le Moata, e le nofonofo ai foi se taofi e tusa o le Tulafono Tau Faaofi e pei ona Teuteu e ala i le Tulafono Autu. E le au ese se agaga ma se faamoemoe e tusa ma le toe salaniina o lenei Tulafono Tau Faaofi. O le mea moni, o le Tulafono e malamalama ai agasala, o le Tulafono foi e mautinoa ai le solitulafono. E le i faavae fua ma e le i ala fua aemaise le lalolagi i sootaga aua le fusia o atunuu uma ma le puipuia o tagata uma ina ia tapue e ala i Tulafono ina ia soifua manuia. O le aso e pei ona aumai i luma le mataupu, o lea ua malamalama faaiu ma e momoli atu ai le agaga faafetai i le Afioga i le Minisita.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

A ou tilotilo i le gasologa mai e pei o lea ua faaopoopo, e pei o lea ua ou vaai atu o le Mediator, ua ou vaai foi ua i ai le law lea o le Justice lea faatoa uma nei foi o lea ua faamaopopo. O sector ia o lea ua tapue. E mafua aisea? Ona o le agaga lava ia, o au foi sa i ai i le galuega ma e ese le mamalu ma le manaia, e ese le onomea, e ese le pau. Aisea? Ona e foliga mai o le fatu lea, ona o le alofaga lea o le soifuaga o tagata ina ia puipuia.

A ua vaai foi la i le gasologa o lea Paeaiga ma lea Paeaiga, ua pei o lea ua faapea pea ane. O le upu sao lava ua le tausisi i le faamaoni ma ua le tausisi i le tautoga, tulouna le faafofoga. Ina ne i safea le tofa maualuga, a o mea ua tulai mai. O nai mea ia o lo o mate i ai, o lea mea ua faaopoopo mai e le tatou Malo, vasega e fia ma tulaga e fia e tapue ai ina ia tutumu ina ia aua ne i gase se mea pe pau se mea. Ua manaia tele. Aisea? E mafua uma lava i le mea lea ona o le le atoatoa. A tilotilo foi ma vaai i le mea o lo o tulai mai i le suspension lea i nai uso ia, o le mea lena o lo o tau aami ai le agaga ina ia tatou savavali ia.

Lau Afioga i le Minisita ma vaega ia e pei ona ou taua, o le e savali ma le faamaoni e manuia lona soifuaga ma lana fanau ma le atunuu, aua o le mea moni ua ala ona fatufatu tulaga ia, ona o le mausali ma ia maopoopo ma ia atoatoa ina ia soifua ma malu puipuia atunuu ma Malo. O le fesoasoani atu lea i lenei mataupu.

O le isi itu ia tautuana le tatou Matagaluega mamalu. Ua ou tilotilo i public places. E leai se pulou i le isi taimi, e ula le sikaleti i le isi taimi. O nai itu faapena - ia inu le ava Samoa a o la e fai le toniga. O le mea moni, o au e tele ina ou inu ava ma talatalanoa ai ma tocaiina i ina, ou te tilotilo pea i ai.

O aso ia a aveese le pulou e molia, a aveese le fusipau e molia. Na ona fotufotuai o le galuega. Ia manuia le aso, manuia le fonu a Samoa.

**FOFOGA FETALAI:** E manatu o lea ua tini tauao le aoga o le lolo i lenei aso mo lau Afioga i le Minisita e a ia le Tulafono, ma e manatu foi ua taua finagalo o sui mamalu, o le taua foi lena o le tulaga na tuuina mai ai le Tusi i le Tulaga Faanatinati e pei ona sainia e Lana Afioga Mamalu O Le Ao o le Malo ona o se Tulafono Tau Faaofi ua tataua ona pasia i le Maota. Ia lafo atu i lau Afioga i le Minisita, o aai o finagalo na tuuina mai e sui mamalu ma alii faipule e matimati ai lau Afioga ma le Matagaluega mo le faatulai mai o lenei Tulafono taua.

Tulai mai lau Afioga i le Sao Fetalai.

**Afioga Hon SALA FATA LISATI PINATI:** E muamua ona ou faafetaia lau Afioga i le Fofoga Fetalai aua le taitaiga o le Maota vaeane le faafofogaaga a le atunuu. Ou te faafetai i sui usufono mamalu o le Palemene i lenei Tulafono Tau Faaofi a o faataatia mai o se Tulafono Tau Faaofi ua faanatinati ona o tulaga ua tataua ona faatino.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

O lenei Tulafono Tau Faaofi ou te manatua ai se tasi o filifiliga a se aiga i le tau sailia o se tasi e agavaa i se tofi maualuga o se matai o lea aiga. Na faapea mai tocaiina ma loomatutua o le aiga, “Ia fili se ua agavaa, vaai se ua lava lana tautua, fai fai matua le tatou maumaga.” A tatou tuu i le aganuu e pei ona tatou i ai i Samoa nei, o lena le lagona. E leai se tasi na te masalomia se tautua o lo o faapea ona faia e alo ma fanau ua taua o malu o le Malo. E mafua ona taua o malu o le Malo aua e i ai le talitonuga o i ina e malutia ai le soifua manuia o le atunuu, e sulufai i ai e ua pagatia i lalo o le Tulafono e taitaia ai le tatou atunuu ma ia usitaia e so o se tagata. O ai lava le Tulafono, le Tulafono ua uma ona aumai ina ia malu ai o tatou tagata.

I lenei taeao, o lea ua taatia i le Maota se tasi o mau ua aumai ina i tusa ai ma se filifiliga e tatau mo le Komesina. Ona ou manatu lea, i le ava e tatau ai ma le faaaloalo masani a Samoa, fai mai o Samoa e pulea e matai, o lea ua i ai le Maota Fono, o sui mamalu o le Palemene o fetu taua o itumalo taitasi o le atunuu ma o le Fonousu a Samoa. O lea ua atoa iinei Samoa ma o lea foi ua molimauina i lenei taeao lagona ua faaalua. O le a ou taumafai la ou te tali atu i tulaga e pei ona i ai lagona ua faaalua i lenei taeao.

O le saunoaga muamua a le sui mamalu mo Faasaleleaga Nu 2. Sa saunoa le sui mamalu ma taua ai le taua o le Tulafono Tau Faaofi ma lana lagolago. Ou te faafetai atu i lau Afioga, ou te manatu ana le avea oe ma tofi o le itumalo, masalo o oe le isi e agavaa i le tofi lenei o le Komesina o Leoleo. E le o se upu e aveane ai ona ua lava lau tautua. E pei foi ona ou taua, fa’i se ua matua ua lava lana tautua. O i ina e faavae ai le filifiliga ma se manatu foi ua faaalua.

O le retirement age i le Tulafono Tau Faaofi, e leai se age o faatapulaa ai le sailiga o le Komesina. I lalo foi o le Tulafono lenei, o le lava e agavaa ua lava lona tomai i mea tau leoleo, ua alaga tatau foi ia ona filifilia pe afai o le a oo i ai se filifiliga a i latou o le a pulea le matafaioi lea.

Na saunoa le sui usufono mamalu mo Faleata Sasae ma taua ai faasalaga o leoleo. O le tulaga e pei ona saunoa i ai le sui mamalu mo Faleata Sasae, o le Komesina e mafai....so o se leoleo lava e solitulafono po o le Komesina foi e mafai ona charge i lalo o le District Court. O le Komesina la o Leoleo e i ai le faitalia pe ua ia te ia le malosiaga na te faamalolo mai ai se ua solia le Tulafono e pei ona molia ai.

E taua foi la faapea i solitulafono e pei ona i ai ia moliaga o lo o taua ai ia le Komesina o Leoleo i Tafaigata, o sau tali atu puupuu e tusa ai ma le mataupu, e mafai e le Komesina, o le Komesina i le tulaga pe afai ae molia mai i le tulafono, i lalo o le fautuaga a le Kapeneta e mafai ai e Lana Afioga Mamalu, O Le Ao o le Malo ona faamalolo ia le Komesina, pe afai ua faapea ona molia ma ua faamaonia lana solitulafono. O le tali atu lea i lau Afioga i le sui usufono mo Faleata Sasae e tusa ai ma le faafesili.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Lau Afioga i le sui usufono mo Faleata Sisifo, ia ou te faafetai atu, faafetai e lagona lou papale mai lou lagolago i lenei Tulafono. Na taua foi e le sui usufono mo Faleata Sisifo le retirement age o le Komesina, pei lava ona avatu lau molimau i lenei taeao e leai se retirement age o le Komesina. Ona ou toe oo mai laia i le tulaga lea i se tagata e le o se Samoa e filifili mai fafo e avea ma Komesina o Leoleo po o le Falepuipui foi, o le tulaga ua faataatia nei e mafai e so o se isi lava ona avea ma Komesina o Leoleo ia atoa ai ma le Komesina o Leoleo o le Falepuipui pe afai e ogatasi ma talafeagai le agavaa ma le tomai o le a faapea ona filifili e i latou o le a faia ia le filifiliga o sui ia.

Na saunoa se tasi o sui usufono mo Salega, Afioga Afualo Wood Uti Salele ma aumai foi le lagolago e tusa ai ma lenei Tulafono, e i ai se tulaga faanatinati ua faataatia mai ai, ma ou te manatu o lo o tofa ai o outou finagalo faale-Atua le tapuaiga a Samoa aemaise o Lana Afioga Mamalu, O Le Ao o le Malo ua faataatia ai lenei Tulafono i lona tulaga faavavevave. Na saunoa se tasi o sui usufono mo Salega, Afioga Afualo Wood Uti Salele i le mataupu lava lea e uiga i le Komesina, pe mafai e se papalagi po o ai lava e ese mai ai i alo ma fanau a Samoa ona avea ma Komesina, ia o lena ua avatu le tali, e mafai. Ma o le agaga lava e faamautu ma e avatu ai se lagona o lou nei foi sui usufono, e faataua lava le aganuu a Samoa ma e pei lava ona saunoa nisi o sui usufono, e le auai o latou finagalo i le tofia lea o ni sui mai fafo, ma e ou te manatu ina ia tatou ausia mea silisili mea e agavaa ma le mea e tataua ona fai e faasilisili lava i le atunuu i le faatumutumuga o le agaga ina ia faapena ona atoatoa le tautua, le tautua le tomai lea i le amiotonu, aua ou te masalo o le tasi lea o vaega ua mafua ai ona laga ni finagalo ona e i ai le talitonuga, fai ma se e tau i ai, ua i ai lagona na i le atunuu, ia ua avea foi lea ma lape i totonu o le auaunaga.

Ou te faamalulu atu foi i le faafofogaaga a Samoa, aua e leai lava se isi e le tofu ma sese, e leai lava se isi, e ta te molimau foi i le Tusi Paia sa faapea mai ai molimau foi a e na avatu le fafine lea po o le tina lea e faasala i tu ma aga foi a i latou sa faapea ai ona faapea atu le Faaola, “a i ai lava se e leai sana agasala, ia muamua togi sana maa.” Ona ou manatu lea i lenei Tulafono Tau Faaofi ma le suiga lea, o vaega ia ua taua o le lagona lava ina ia malu nai o tatou tagata mai le tele o tuuaiina a le atunuu, aua a tatou manatu i tu ma aga a tatou, ia fai mai foi se tasi o muagagana a le aufaifaiva, “ia e asa lava le faiva ae le asa le masalo.” Ona manatu lea o le tasi lea o vaega lea sa faapea ona silafia e le Tulafono ma e sa latou faafoea maia lenei Tulafono Tau Faaofi i lona aotelega, ina ia sao ma uli le sa o Samoa i le tautua lea, tautua na fai i le Tautoga e faapea, “Ou te tauto atu ou te faatino ou tiute ma le atoatoa.” Ioe, o le agavaa e le faaituau. Po o lou uso, po o lou aiga po o se isi ou te masani ai, ou te le faaituau. E pei o mau ia, o mau ia ua mafua ai ona faapea ai se lagona o i latou na fuafua maia lenei Tulafono Tau Faaofi ina ia dispel ai, ia aveese atu ia tuuaiga mai o tatou tagata.



Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Ou te faatulou atu foi i se faafofogaaga a le Komesina o Leoleo ia Fou Lilomaiava po o Sala Seaga foi, aua ou te manatu o lea e faafogafoga mai i felafolafoaiga a le Palemene i lenei taeao, faafetai, faafetai le tautua, e leai e le o tuuaia i a oulua afioga, sei vagana lava ua faapea mai le Iuga a le Faamasinoga, ua pu vai ma puvai laitiiti se isi o oulua, ona faatoa faapea atu laia lea, ua oulua soli le tulafono, ae malo le lavapapale mai o le a taumafai atu la tatou pitolaau, o le a lava le tulaga o le a i ai, o lena. Ou te manatu o lo o ao pea i o outou finagalo aemaise o le tapuaiga ia le tatou faatuatuaga e tasi lava, ua na o le Atua lava, e aumai e le Atua le mea moni e taitaiina ai ia le tatou Maota nei.

O le saunoaga a le sui usufono mo Gagaemauga Nu. 2 e lagolago i le Tulafono ae tetee i le auai o se tagata mai fafo. Ia lau Afioga i le sui usufono mo Gagaemauga Nu. 2, ia a ta o loa i lo ta itumalo o taua lava e tasi, ae le faia mea na iinei i le Maota.

Tofa Levaopolo Talatonu: Lau Afioga i le Fofoga Fetalai...

**FOFOGA FETALAI:** Ia malie lau Afioga i le sui usufono mo Gagaemauga Nu. 1, o lea sei tulai atu Gagaemauga Nu. 2, tulai mai le sui usufono mamalu.

Tofa Levaopolo Talatonu: Faafetai leai, e leai se ma faafinauga ma si ou uso e ma te soo tulutulu i lo ma itumalo. Ua ou faalogologo atu ua matua mamafa lava le tauga o le tetee a le Afioga i le Minisita i le tulaga pei ona ou fai atu ai e moni, e sao, e matuai ou tetee lava i ai, lea faatoa uma atu nei ona e faamanino le tulaga e ao ai ona aumai ni papalagi, e faanoanoa ai lava lou mafaufau lau Afioga.

O le tulaga e mafua ai ona ou faanoanoa, ona o lea e aumai le mafuaaga o le fauina o le Tulafono e fua i luga o masaloga o sootaga i totonu lava o le tatou atunuu i le Komesina ma aiga ma mea faale-uo, na ona ou tau atu i lau Afioga ma le agaga faaaloalo, o lea foi e i ai ia tulaga faapena i isi atunuu, e i ai foi aiga o Komesina o Niu Sila latou ia ma Ausetalia ma isi lava mau atunuu i totonu lava o latou atunuu, a o la e fili lava le tagatanuu ia o lona ia atunuu i le tulaga Komesina. Ia e pei o le tulaga lena o lea ou te tau manatu ai, e....ia faafetai.

**FOFOGA FETALAI:** Malo. O lea ua maua le faauilavea a le sui usufono mamalu, o le a tulai mai le Minisita e faamalamalama le atugaluga lea sa saunoa i ai le sui usufono.

**Afioga Hon SALA FATA LISATI PINATI:** Ou te faamalulu atu i lou uso, malo uso, faafetai. Ou te faamalulu atu afai foi ua mamafa le tetee, leai la aveese le tetee, e le auai sou finagalo. Ae na taua e le sui usufono mo Gagaemauga Nu. 2 faapea o masalomia faale-Aganuu ma faa-aiga ua molia ai Sala ma e leai, e le o lena le itu.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Ona o tuuaina lava ua aumai ia tusitusiga foi, ia o nei lava tusitusiga e le faavaea tusitusiga, ma e tou te silafia foi, o i latou o lo o nofosala i uta, ia e i ai le mea foi lele o le question mark tele lava, pe faamaonia nei tuuaina, aua foi o lea ua ala ona faasala ua masalomia le latou auaunaga ma le latou galuega sa fai.

Tofa Levaopolo Talatonu: Lau Afioga i le Fofoga Fetalai malie lava lou finagalo, ina ne'i taitai sese le faafofoga a le atunuu i le toe tali mai a le Afioga i le Minisita, leai e le o le mataupu lena sa ou tautala atu ai lea e saunoa mai ai le Afioga i le Minisita.

FOFOGA FETALAI: O lea ua maua le sui usufono mo Gagaemauga Nu. 2.

Tofa Levaopolo Talatonu: Leai o le tulaga i le tofiaina o le Komesina lea sa saunoa i le taimi ua sola e pei e foliga foi lele e i ai lava le masalo, pei o le mea lena ua ala ai ona aumai ai papalagi, lea la sa ou fai atu, o la foi e Komesina lava tagata Niu Sila ia i totonu o Niu Sila e le o avatua nisi mai isi atunuu. Ma le agaga faaloalo.

FOFOGA FETALAI: O lea la ua malamalama. Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielega: Lau Afioga i le Fofoga Fetalai, e pei e i ai se manatu foi lele o le a aumai se palagi. E matua sese lea taofi, na o le pau lava le mea lea e avatu i le Tulafono ia maua se avanoa i nisi e talosaga mai ai ma lautele ai le filifiliga e fai.

O lona uiga, a tatalo mai foi ni Samoa i fafo o nisi o latou sa Komesina, aua e i ai Samoa sa Komesina o Leoleo i Niu Sila, a tatalo mai foi, ia maua foi so latou avanoa e mafai ai ona fai se filifiliga, pau lava lena. O lona uiga o le Tulafono o se mea e tua i ai le filifiliga a lo tatou Malo, pe afai e aumai, e i ai le mea lea e tupu nei e tele lava mea o faasalalauga e alu atu le faasalalauga e fia vaiaso, na o le tasi lava le tagata e talosaga mai, toe liliu atu le PSC toe faasalalau, sau, e na o le tasi lava. A o lena foi Matagaluega o la e tatala le avanoa, a o i ina la o le a atili ai ona pu-moomoo ona o lea e taofi lava aua e leai lava se isi e mafai i ai, ae na o tatou lava. A o la e tóatele isi e mafai ona tatalo mai e pei la ona avatu ai le avanoa, ae le faapea o le a fai ai. Aua o le filifiliga e fai faai, e fua i luga o le tulaga ua ausia le tomai. E i ai la i le faasologa o le filifiliga, e i ai le Panel o i latou o tagata latou te silafia ma fautuaina le Kapeneta ia i latou nei ua lava le tomai. Ona aumai foi lea o le latou fautuaga i le Kapeneta. E le faapea la o iinei Tuivasi i le Kapeneta o le a aumai lava le fautuaga e vaai atu o la e i ai le Samoa e talafeagai a o le a aumai lava se isi e le talafeagai.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

O lona uiga e ave lava le faamuamua i o tatou tagata iinei, ae a leai la se tagata iinei a o lo o i ai se isi mai fafo e sili atu ma o se isi foi Samoa, o i ina la e fai i ai le faaiuga.

Lau Afioga i le Fofoga Fetalai, o le mea lea o lea ou te matau atu e pei ua popole faapea o le a aumai ni papalagi. Pau lava le avanoa lea e avatu i le Tulafono Tau Faaofi, o le avanoa e tatala ai faalautele le avanoa ia i latou e mafai ona talosaga mai i le faitotoa lea ua tatala atu, a o le luitau foi lena mo i latou o lo o i ai nei ina ia matua siitia le latou galue ina ia aua lava ne i sao mai se tagata i fafo. O le matua luitau mo i latou ia o lo o i ai i totonu o le Matagaluega.

Lau Afioga i le Fofoga Fetalai, o le itu taua lena. O lea foi ou te matauina afai ua fai e le Minisita lea tulaga ina ia aveese ai le masalosalo, e tatau ona tatou faapea ua to o tatou pulou i le Minisita. Aua a alu alu sau le filifiliga, “O Sala la le o le a Komesina i uta o le a toe filifilia foi, a o lea foi e i ai lea Sala?” O le a faapefea nei la? O le a Sala le Minisita toe Sala e faauluulu i ai Tafaigata? Ae a sau loa le vaega lea ona faapea o tagata, “O lea la e manaia le mea lea e le o i ai se tulaga e faaaauai ai le Minisita. E tatau la ona tatou ave le faamalo i le Minisita e pei ona saunoa le isi sui usufono, a o le conflict of interest lea o le a faigofie ona tali iinei ona o lea ua laa le Minisita, ua le vaai lava i le itu taumatau po o le itu tauagavale, ae ua agai e faataoto le auala ina ia tatou taunuu i se faaiuga e silisili ona lelei i le matau a le atunuu.

Ia manatua foi e i ai le upu foi lea, “O le mea lenei o le amiotonu – justice must be done and it must also be seen to be done.” O lona uiga e le gata ina tatou faia le amiotonu, a o gaoioiga foi tatou te faia e atili faamautuina ai o le amiotonu lea e fai. O lona uiga la o le faatinoina o le Tulafono Tau Faaofi lenei ma le aumaiga o le Teuteuga, o le matua tulituliloaina lava o le amiotonu i ona tulaga e tatau ona fai e pei ona agai i ai le Afioga i le Minisita.

O lea e i ai le mataupu lea sa laga mai ma ua uma foi ona tali i ai le Minisita, ae na ona toe faaopoopo atu. O lea ua lafo i le vaega lea a le Ombudsman po o le Komesina o Sulufaiga ua i ai o latou tiute e mafai ai ona latou faia foi ni suesuega e faasino i le Ofisa o Leoleo pe a i ai ni mea e tuuaia ai. Ua tali ai foi la le isi fesili lea. E suesue e leoleo tatou, a o ai la e suesueina leoleo? O lea la ua aveese mai le tulaga lena i lalo o le Ombudsman ma o le Ofisa lea ua tofia sao atu e le Palemene lenei ina ia tutoatasi lana faaiuga ma ia faatino ai tulaga o mea e tatau ona i ai ma aveese ai le masalomia e faapea o lea e le o faia e leoleo o latou tiute.

Lau Afioga i le Fofoga Fetalai, o le toe fesoasoani atu lena i le taumafai mai a le Minisita.

**FOFOGA FETALAI:** Faafetai fesoasoani mai lau Afioga i le Palemia i le saunoaga faamalamalama i finagalo faaalua o nisi o sui usufono.

Tulafono Tau Faaofi o Teuteuga o le Tulafono o Galuega  
Tau Leoleo 2013 – faitauga faalua

Ou te faamalulu atu i lau Afioga i le Minisita ona o lea ua tatou taunuu tonu i lo tatou taimi malolo. O le a faaauau lau folasaga mo le tali atu pe a tatou foi mai i le tatou malologa masani o le taeao.

Ou te faasilasila atu o le a faataatia ese Taulumaga a le Fono Aoa mo lana malologa masani o le taeao.

*Na faataatia ese Taulumaga a le Fono Aoa mo lana malologa masani i le itula e 10:50 i le taeao ma toe faaauau i le 11:25 i le taeao.*

**FOFOGA FETALAI:** Malo faafetai i le Agai o le Maota. Ua matauina le le atoatoa o le malosi a o lo o taumafai pea ona o le faataua o le valaauina aua le tautuaina o le Maota Fono.

E manatu ua foi mai i le malologa masani ma e i ai le talitonuga ua maua lo tatou faasiliga malosi i lenei vaega o le aso. E momoli atu le faafetai tele i le faamalolosi i le tatou Fono. E talitonu o lo o tele ma anoanoai a tatou galuega tuua a o le i faaumaina le tatou Fono i lenei aso e pei ona faatulagaina.

E fai le malologa o lo o sausaunoa le Afioga i le Minisita e tali mai i nisi o finagalo sa faaalua i le Tulafono Tau Faaofi. Ua maea foi ona tali malamalama ma faamanino e le Afioga i le Palemia le auga ma le faamoemoe ao le toe faatulai mai o lenei Tulafono Tau Faaofi taua ona o le manatu i le toe faatulagaina o le Matagaluega ina ia lelei ma atoatoa le auaunaga.

Tulai mai lau Afioga i le Minisita e faai mai le saunoaga.

**Afioga Hon SALA FATA LISATI PINATI:** Lau Afioga i le Fofoga Fetalai, ou te manatu o lea ua uma le taliga o le sua ae a se faasiliga malosi aua le paia o le Maota nei.

Ou te talitonu ua nofo fale i aai o finagalo o le Maota le tulaga e pei ona i ai le saunoaga a le Palemia ma ua nofo malamalama foi i le tulaga e pei ona i ai le aotelega o lenei Tulafono Tau Faaofi. E momoli atu ai lau faafetai tele i sui usufono o le Maota e tusa ai ma le lagolago mai i lenei Tulafono Tau Faaofi.

E faauma atu ai sau faamatalaga e pei lava ona taua e le sui usufono mo Aana Alofi Nu.3 nisi o alo ma fanau o lo o i le militeri pe agavaa. Ou te talitonu ma o le tali, e agavaa lava so o se isi pe afai ua i ai le tomai, taleni ma le potu faa-leoleo na te gafatia ai galuega faa-leoleo.

Ma le faaaloalo lava e faauma atu ai sau tala, ia faamanuia mai le Atua i le Usugafono a Samoa. Soifua ma ia manuia.

**FOFOGA FETALAI:** Malo faafetai mo le saunoaga a lau Afioga i le Minisita ma e manatu ua manino ma ua malamalama i le faafofogaaga a le Maota i lenei vaega o le aso.

**9 OKETOPA 2013**

**Tulafono Tau Faaofi o Teuteuga o le Tulafono o Galuega  
Tau Leoleo 2013 – iloiloga auiliili**

**O le a tulituliaupu le tatou mataupu leaga o lea e i luga o le tulaga faanatinati.**

*Na faamaonia le lafo ma faitauina le Tulafono Tau Faaofi o Teuteuga o le Tulafono o Galuega Tau Leoleo 2013 i lona faitauga faalua.*

**TULAFONO TAU FAAOFI O TEUTEUGA O LE TULAFONO O  
GALUEGA TAU LEOLEO 2013 – iloiloga auiliili**

**FOFOGA FETALAI:** Talu ai ona ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoao i le iloiloga auiliili.

**E tusa ai ma Tulafono Tumau e amata le iloiloga auiliili i le Fuaiupu 2.**

**FUAIUPU 2:** Ua suia le fuaiupu 13.

*Faamaonia.*

**FUAIUPU 3:** Ua soloia le Vaevaega 4 o le Vaega III.

*Faamaonia.*

**FUAIUPU 4:** Ua suia le fuaiupu 51.

*Faamaonia.*

**FUAIUPU 5:** Aiaiga tau soloaiga.

*Faamaonia.*

**FUAIUPU 1 MA LE IGOA:**

**FUAIUPU 1:** Igoa puupuu ma le amataga.

**IGOA:** TEUTEUGA O LE TULAFONO O GALUEGA TAU  
LEOLEO 2013.

*Faamaonia.*

## 9 OKETOPA 2013

### Tulafono Tau Faaofi o Teuteuga o le Tulafono o Galuega Tau Leoleo 2013 – faitauga faatolu

*Na faagasolo le Tulafono Tau Faaofi o Teuteuga o le Tulafono o Galuega  
Tau Leoleo 2013 e aunoa ma se Teuteuga.*

### TULAFONO TAU FAAOFI O TEUTEUGA O LE TULAFONO O GALUEGA TAU LEOLEO 2013 – faitauga faatolu

**FOFOGA FETALAI:** Talu ai ona ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoa o le faitauga faatolu o le Tulafono Tau Faaofi.

Tulai mai le Afioga i le Minisita mo Leoleo ma Falepuipui.

**Afioga Hon SALA FATA LISATI PINATI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega tau Leoleo 2013 i lona faitauga faatolu.*

*Faaluaina e le Minisita mo Galuega, Felauaiga ma Atinae Eseese.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.*

### ILOILOGA O LIPOTI A KOMITI FILIFILIA

**P.P.2012/2013 NU.35, LIPOTI A LE KOMITI O MATAUPU TAU LE VA I FAFO, FEFAATAUAIGA MA TUPE MAUA I LE P.P.2011/2012 NU.31, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2008 MA LE P.P.2011/2012 NU.45, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2009 - ILOILOGA**

**FOFOGA FETALAI:** E tolopo Galuega i le Aso Fono ananafi, 8/10/2013 ua maea ona saunoa le Afioga i le Sui Taitaifono i Fautuaga ma Iugafono.

O le avanoa leni pe afai sa i ai se sui usufono sa fia saunoa i le Lipoti ananafi, ae a faapea o lea ua matua manino ma malamalama le saunoaga a le Afioga i le Polofesa, o le a tuu atu le fesili.

Tulai mai le sui usufono mamalu mo Faleata Sisifo.

**Tofa LEALAILLEPULE RIMONI AIAFI:** E puupuu lava se manatu lau Afioga i le Fofoga Fetalai, faafetai lava mo le avanoa.

## **9 OKETOPA 2013**

**P.P.2012/2013 Nu.35, Lipoti a le Komiti o Mataupu tau le Va i Fafo, Fefaatauaiga ma Tupe Maua i le P.P.2011/2012 Nu.31, Lipoti Faaletausaga a le Pulega o Tupe Faava o Malo a Samoa mo le tausaga faaletupe faaiuina aso 30 Iuni 2008 ma le P.P.2011/2012 Nu.45, Lipoti Faaletausaga a le Pulega o Tupe Faava o Malo a Samoa mo le tausaga faaletupe faaiuina aso 30 Iuni 2009 - Iloiloga**

Ona e taua tele le sao o lenei Matagaluega i le atinae o le atunuu, ae pau le popolega lea ua i ai o le tulai mai pea o nisi o lo o i ai a latou teugatupe i mea nei ma aafia i nisi vaega ona e i ai foi nisi o faalapotopotoga e suesueina tagata e i ai a latou teugatupe i mea nei. O le fautuaga i le Matagaluega, faafetai e le o tali i mea nei e sau aua o lea tatou te faitau pea i nusipepa i lea aso ma lea aso e faaono aafia ai, ma e i ai nisi o atunuu o le Pasefika e pei o Rarotoga ma atunuu ia, ua tele le afaina o i latou nei e i ai teugatupe nei ona ua mafai ona faalauaitele o latou igoa i totonu o nei atunuu, a o mea ia e tataua ona malu puipuia. Ae ona o fautuaga a le Komiti ia faatosina mai i latou ina ia faatupulaia le aofai o i latou e fialia e faaputu a latou tupe i nei ma maua ai foi sina vaegatupe e fesoasoani ai i a tatou atinae ma mea e fai ina ia mautinoa e malu puipuia vaega uma nei, aua o i ina e mafai ai ona toe faatupulaia le aofai o i latou e fialia mai e faaoga. Aua o lea ou te maitauina nei i le tele o atunuu o le Karepeane ma le Pasefika o lo o i ai vaega nei, e tele le sao i le tamaoaga o le atunuu o vaega nei. Ae pei o nai vaivaiga na afai o lo o tagai lelei i ai le Matagaluega, ona lelei lea mo le agai i luma o lenei foi Matagaluega taua i totonu o le tatou atunuu.

Ma le faaloalo lava. Faafetai.

**FOFOGA FETALAI:** Malo faafetai. Tulai mai le sui usufono mo Gagaemauga Nu.2.

**Tofa LEVAOPOLO TALATONU:** Faafetai i lau Afioga i le Fofoga Fetalai. E puupuu lava se fesili e fia malamalama mai ai i le tulaga o le Matagaluega. A silafia foi e lau Afioga o le fale lea o le Matagaluega lea po o le Faalapotopotoga o le SIFA, le tatou fale lea ua uma ona totogi le tusiga o le ata ma tulaga uma ma le tapenapenaga, ae o lea lava ua tele tausaga tatou te le i vaai lava i se tulaga ua tino mai, e fia malamalama ai foi lou sui usufono i lea vaega. Ma le agaga faaloalo.

**FOFOGA FETALAI:** Malo. Ia, tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea e tolo le galuega mo le taimi nei. O lo o faagasolo isi a tatou fale ae oo lava i ai.

O le vaega lua lau Afioga, ua 21 nei, o lea ou te tau manatua ua 21 nei tausaga talu ona tatou faia le ituaiga atinae lea, e oo foi i le Malo o Amerika lea latou te faia, malo tetele i fafo o le lalolagi o la e latou te faia.

## 9 OKETOPA 2013

P.P.2012/2013 Nu.35, Lipoti a le Komiti o Mataupu tau le Va i Fafo, Fefaatauaiga ma Tupe Maua i le P.P.2011/2012 Nu.31, Lipoti Faaletausaga a le Pulega o Tupe Faava o Malo a Samoa mo le tausaga faaletupe faaiuina aso 30 Iuni 2008 ma le P.P.2011/2012 Nu.45, Lipoti Faaletausaga a le Pulega o Tupe Faava o Malo a Samoa mo le tausaga faaletupe faaiuina aso 30 Iuni 2009 - Iloiloga

A o le mea lea e ese ai tatou, e faatoa faatu nei tatou ae ua leva ona faatu isi atunuu ma e tatou te faaaogaina lo latou experience, mea na latou sese ai e faavae ai le tatou atinae. Tatou te i ai foi i totonu o le lio o le komiti latou te mataituina ni uiga ua le tausisia i atinae nei eseese i totonu o atunuu nei i le uunaia o tupe foi nei e tau o tupe eleelea. O Samoa la le isi atunuu o lea e maualuga lona tulaga o le tausisia o Tulafono Faava o Malo.

E i ai le tausaga a o ou Minisita o Tupe na ou freeze ina ai teugatupe a le isi foi tagata ua sao mai totonu o le system ae na iu lava ina maua. Na ou freeze ina ai iinei i Samoa ma pasiina ai le Tulafono i le tausaga e 2001, o le toe Fono lava lena tatou agai loa e fai le faiga palota, pasi le Tulafono ina ia faafaigofie ai gaoioiga a le tatou SIFA e faasaga i le kamupani lea. Ma o le iuga o le kamupani lena, ua faasala uma latou e le Malo o Amerika, o le kamupani e sau mai Amerika. E leai la se mea tatou te popole ai ona o le tulaga o lo o i ai tatou i totonu o le lio i le vaaiga o mea o atunuu nei e le o tausisia tulafono. Ma o tatou foi sa Taitaifono le tatou Kovana o le Central Bank i le Komiti Faapitoa mo le vaaiga o gaoioiga o lo o fai, ae sao le manatu na faaalua, o nisi o Bahamas i le tausaga na matou i ai i ina i se tasi o fonotaga, na ou vaai ai e ova i le 500,000 le aofai o kamupani i fafo lea e lesitala i totonu o le latou lesitala. Ma o tupe uma lava e faagaioi ai le Malo, e sau uma lava i le mea lea.

O tatou masalo pe na o se 30 le aofai o kamupani, o se tulaga faapena, e le i taitai oo tatou i mea tetele la e faagaioi ai atunuu i fafo ona o le malosi o le tauvaga, o le ala foi lena o lea e fai ai ma aumai pea Tulafono i totonu o iinei. E le i leva foi ona tatou pasia faanatinati le isi Tulafono ina ia mafai ai ona tali atu tatou i manaoga o ituaiga atinae faapenei mo offshore jurisdictions ina ia tumau ai pea tatou i le maualuga o le taualoa faava o Malo.

Lau Afioga i le Fofoga Fetalai, o le tali puupuu atu lena i le faafesili.

**FOFOGA FETALAI:** Malo. Ou te manatu ua uma ai i i finagalo lau Afioga i le Taitaifono. Pe i ai nisi mea e te toe fia saunoa i ai?

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se tali i Fautuaga na tuuina mai i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa lenei Lipoti.



9 OKETOPA 2013

P.P.2012/2013 NU.48, LIPOTI A LE KOMITI O TUPE MAUA MA  
TUPE TOTOGI I LE P.P.2011/2012 NU.93, LIPOTI FAALETAUSAGA  
A LE KAMUPANI O PULEGA FAAPUTUGATUPE  
TEUFAAFAIGALUEGA O MAVAEGA TAUSI A SAMOA MO LE 16  
MASINA FAAIUINA ASO 30 IUNI 2011 - ILOILOGA

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG (Taitaifono, Komiti o Tupe Maua ma Tupe Totogi): Lau Afioga i le Fofoga Fetalai ma le faaaloalo ou te faatu le lafo, *Ina ia faautagia e lenei Fono Aoa le lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow ma le sui usufono mo Sagaga le Usoga.*

FOFOGA FETALAI: Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG: Lau Afioga i le Fofoga Fetalai:

“SAILIILIGA:

O le tausaga 2008 na faavaeina ai le Faaputugatupe Teu Faafaigaluega o Mavaega Tausi a Samoa e tusa ai ma aiaiga o le Tulafono o Faaputugatupe Teu Faafaigaluega o Mavaega Tausi 2008. Na o le pau foi lea o se ituaiga Faaputugatupe faapea i totonu o Samoa ma o lana Lipoti Faaletausaga muamua foi lea ua tuuina mai i le Fono Aoao Faitulafono. E tele ni luitau na feagai ma le Pulega i totonu o lenei tausaga, aemaise i le vaega tau maketi faapea ma le siitia o le silafia ma le malamalama o tagata lautele i le teufaafaigaluegaina o a latou tupe i le Faaputugatupe, aemaise ai o le faamalamalamaina o faamoemoega na faavaeina ai lenei auunaga a le Malo.

I le taimi nei, ua tuuina atu le lagolago malosia a le Malo i le Faaputugatupe ma ua tuuina atu foi lana faamalumaluga mo le isi 10 tausaga ma ua faaitiitia ai foi tulaga tau lamatiaga o tupe ua teuina i le Faaputugatupe.

Ua tapena e le Faaputugatupe se ata faataitai mo ana vaega tau tupe e iloa ai le tulaga tau tupe i totonu o le isi 3 tausaga. O lea tapenaga ua mafai ona iloa ai le taua o le ausia o se aofaiga e le itiiti ifo i le SAT40miliona e teufaafaigaluegaina, ona faatoa mafai lea ona tutoatasi mai le Malo lona faafocina.

## 9 OKETOPA 2013

**P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiuina aso 30 Iuni 2011 - Iloiloga**

O lea aofaiga ua tulimataia nei e le Faaputugatupe ina ia ausia i le aso 30 Iuni 2012.

Ua siitia le aofaiga o meatotino a le Faaputugatupe talu mai le amataga i le aofaiga e SAT2.7miliona, i totonu o le 12 masina. Ua oo atu foi i le SAT10.43 miliona aseta faatusatusa i aitalafu e SAT7.96 miliona. O le aofaiga e SAT7.96miliona o nei aitalafu, o le tau lea o le 25% o sea o le Malo i le Kamupani Bluesky SamoaTel, lea ua faasee mai i le Faaputugatupe Teu Faafaigaluega o Mavaega Tausi. E lei totogiina atu foi e le Faaputugatupe Teu Faafaigaluega o Mavaega Tausi se tupe i le Malo mo ia sea, seia maea le 5 tausaga, ona faatoa amata totogi lea. E le o i ai foi se tului i luga o nei aitalafu mai le Malo. Ua i ai foi le fuafuaga a le Faaputugatupe Teu Faafaigaluega o Mavaega Tausi mo le amata totogiina o lea vaegatupe i le taimi e tatau ai ona totogi.

O lona uiga, e 75% o le aofaiga atoa o tupe a le Faaputugatupe Teu Faafaigaluega o Mavaega Tausi, o lo o teu faafaigaluegaina i le Bluesky SamoaTel e pei ona i ai i le aso 30 Iuni 2011, a o le isi 25% o lo o teufaafaigaluegaina i nogatupe ua tuuina atu i Faalapotopotoga a le Malo.

### 6.1 Faatinoga o galuega

I le avea ai o le Pulega ma auala e teufaafaigaluegaina ai tupe a tagata Samoa lautele, e saunia ai foi se auaunaga mo pisinisi i Samoa, ma tagata Samoa o lo o aumau i atunuu i fafo. E faavae le faatinoina o lea auaunaga i vaega e lua:-

- Kamupani o lo o vaaia le Faaputugatupe Teu Faafaigaluega o Mavaega Tausi a Samoa.
- Vaega Tausi Mavaega.

E pulea e le Malo le vaega o le kamupani o lo o pule i le Faaputugatupe Teu Faafaigaluega o Mavaega Tausi ma na matauina e le Komiti, o lo o i ai lava le naunautaiga o le Malo, ina ia taunuu i se taunuuga lelei le Faaputugatupe Teu Faafaigaluega o Mavaega Tausi a Samoa. O le naunautaiga foi a le Pulega, ia avea le Faaputugatupe Teu Faafaigaluega o Mavaega Tausi a Samoa, o se faaputugatupe aupito tele i le itu toatele o tagata e teufaafaigaluegaina ai a latou tupe.

## **9 OKETOPA 2013**

**P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiaina aso 30 Iuni 2011 - Iloiloga**

Ua matauina foi e le Komiti, e SAT700,000 le aofai o le fesoasoani a le Malo mo le Faaputugatupe Teu Faafaigaluega a Samoa mo lenei vaitaimi, ma e le tumau. E fuafua lava e le Malo le aofaiga o tupe mo le tolu tausaga.

O le vaega tausii mavaega lea, e nafa ma le teufaafaigaluegaina o tupe teu a tagata lautele, ma ua matauina foi e le Komiti le siitia o le aofai o le aufai-iunite mai le 200 ia Iuni 2011 i le 372 ia Fepuari 2012 ma e SAT27miliona le aofaiga o tupe teu o lo o i ai i le taimi nei. O le fuafuaga a le Faaputugatupe, ia ausia le SAT40miliona i le faaiuga o lenei tausaga.

### **6.2 Polokalame Faalauiloa**

O lo o faaoga e le Matagaluega le televise e faasalalau ai faatinoga ma le taunuuga o tupe teufaafaigaluega e tusa o ana matafaioi. O ia polokalame o lo o uunaia ai foi e le Faaputugatupe le mamalu o le atunuu o lo o alaala i nuu i tua, mo le teuina o latou tupe mo faamoemoega o lo latou lumanai. Peitai, na matauina e le Komiti, o lo o ave lava le faamuamua a le atunuu i faalavelave ma le tautuaina o le lotu.

### **6.3 Asiasiga a le Komiti**

Na asia e le Komiti le ofisa autu o le Faaputugatupe Teu Faafaigaluega o Mavaega Tausi a Samoa ma matauina ai le sologa lelei o lona faafoega e ala i le faatinoga o galuega. Peiai, e manatu le Komiti, e tataua ona faaauau pea polokalame faalauiloa mo le silafia e le atunuu lautele o le taua o lenei auaunaga ma le nofoaga tonu o lo o i ai le ofisa, ina ia faigofie ai ona autovaa atu i ai mo mataupu e fia malamalama atili ai.

### **FAUTUAGA:**

I le maea ai o Iloiloga a le Komiti, na faaiugafonoina ai e fautuaina le Malo -

- 1. Ina ia faaauau pea ona tuuina atu le lagolago i le Faaputugatupe Teu Faafaigaluega o Mavaega Tausi a Samoa e ala i vaegatupe faatatauina i tausaga faaletupe taitasi, e fesoasoani ai i ana galuega faatino mo le uunaia ma le siitia o lana auaunaga.**

P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiaina aso 30 Iuni 2011 - Iloiloga

2. Uunaia pea polokalame faalauiloa mo le atunuu lautele, ina ia silafia ai e i latou le taua o le auaunaga o lo o faatinoina ma le faamoemoe na faavaeina ai, ma ia siitia ai le aofai o le Aofai-Iunite.

#### IUGAFONO:

I le maea ai o Saililiga a le Komiti, na faaiugafonoina ai e fautuaina le Fono Aoa:-

Ina ia faamaonia le P.P. 2011/2012 Nu. 93, Lipoti Faaletausaga a le Faaputugatupe Teu Faafaigaluega o Mavaega Tausi a Samoa mo le 16 masina na faaiaina i le aso 30 Iuni 2011.”

**FOFOGA FETALAI:** Ia, se i tuu atu muamua le avanoa i le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le Lipoti leni e faasino i Faaputugatupe Teu Faafaigaluega o Mavaega Tausi a Samoa po o le Unit Trust. Masalo e lelei ona silafia e le Maota, o le Faalapotopotoga tonu lava leni na amata lava ona lagalaga mai e le Kapeneta a Mataafa ina ua faatoa tutoatasi le tatou Malo. O le agaga ma o se agaga taua tele na laga mai i le taimi lena i le tulai mai o le atinae a le atunuu leni aemaise atinae e faatino e i latou e tele tupe po o i latou foi mai fafo, e tatau lava ona i ai sina vaega e faaagaaga e mafai ona sao i ai le toatele o tagata vaivai o Samoa ina ia le mafai ai ona faaputupu le oa a le atunuu, le wealth i ni tagata toaitiiti. Ma o ia moomooga sa amata lava ona lagalaga mai i le taimi o Mataafa ona faasolo mai ai lava lea, faasolo mai ai lava, faasolo mai ai lava, aemaise lava ina ua amata ona omai le vaega foi lea fai mai o le a fau se faletalimalo e \$300miliona i tai i Taumeasina, ona atili tupu tele ai lea o le manatu lena, ina ia i ai se auala e faasafua atu ai le wealth o le atunuu i tagata lautele ina ia aua ne i concentrated, aua ne i faaputupu i lima o le toaitiiti. Ona oo mai lea i le tausaga e 1970, 1972 oo mai i le 1975, ua agai lava ina malos tele le uunaiga. A o le faalavelave, na ona faasalalau lava o faiga nei, ae pei e i ai lava le mea lena, e le iloa pe o la e faapefea ona fai lea mea. Ona faasolo mai ai lava lea faasolo mai ai lava oo mai i le taimi ua amata ona faamatuu atu i tua aseta a le Malo, ma tele ai foi finagalo sa faalia i totonu o le Maota leni o le a alu uma i tua aseta a le Malo ma umia e ni tagata toaitiiti.

Ia, o le agaga lava lena e tasi o lea la na mafua ai loa ona tilotilo totoa le Kapeneta ii, ua leva tele ona faatalanoaina leni mataupu ae le i faia lava se gaioiga i ai.

## 9 OKETOPA 2013

P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiaina aso 30 Iuni 2011 - Iloiloga

Ona oo mai loa lea i le taimi o le a faamatuu atu i tua le tatou SamoaTel, lea na peti loa i ai le Blue Sky. O le tulaga foi o le tatou atunuu, ua le o toe i ai ni tatou nonogatupe, national development loans o faia i le taimi nei. A o le taimi lea o le 1976 faasolosolo mai ai lava, o le tele ia o tatou development loans sa fai, o nogatupe e nono mai ai e tagatanuu o Samoa latou tupe e atiae ai le Malo i ni tului tetele lava.

Ou te manatua i lou tausaga muamua sa ou tutulai atu ai i i ae aumai le talosaga a le Itu Agai, se i aumai lava fuainumera o latou o lea e noatia ai le Malo ona o nogatupe nei e fai mai e tagata o le atunuu? Ona ou sau ai lea ma le faila tele lava e faapenei le mafiafia i luga, lea la na tolaulau lea e Tofilau. Ou te manatua le taeao na tolaulau mai lava e Tofilau i le ta o le 9, a o le toeaia foi lena o Tofilau e fai meafono. Ia ua lau uma lava koma e oo i piriota ma mea uma lava, ua lau uma lava. O le mea la ua tupu, ua lau lau lau e le Palemia, ua tulemomoe uma le Itu Agai na mananao mai i fuainumera. Ona faapea mai lea o le Taitai o le Itu Agai, ua lava lea. Ae tali atu Tofilau, "Ua alu le la vaiaso o ou koloni ona o le taliga o le mea lea." Na lau mai lava i le 9, e ta le 1 o lau, a ua momoe uma le Palemene.

Ua ala ona ou taua lea mea, ona o le toatele o tagata o le atunuu, o lea e i ai a latou tupe. O le isi toeaia na o le \$50, a o le agaga lava, o le fia sau e aumai lana tupe e teu i le Malo e atiae ai lona Malo. O le tele o toeaia, o isi e omai mai Savaii, e \$2,000, \$3,000 isi, o Faalapotopotoga e \$10,000. E le mafai ona galo i le Kapeneta le taeao lena. Ua oo mai nei la o le a tender le Blue Sky e tusa ai foi o le naunautaiga ina ia tuu atu i tua mea ia ia aua ai nei toe gau le Malo, ona fai ai lea o le iuga a le Kapeneta. E le mafai ona tender ina le mea lea se i fai muamua le mea lea ua ova i le 40 tausaga ae na ona pese lava ae leai se mea e faia. O lea la na tusia ai loa le Tulafono ma pasia ai loa le faatuina o le UTOS. Ia, ona vavae ese ai loa lea o se vaega o sea ia e mafai ona tuu i totonu ii, a i ai la ni seleni a tagata ona faasalalau loa lea ma o atu teu ai i o ae nofo le UTOS ma spread out foi lea e teu solo i totonu o kamupani ia. Ona fealua lava lea o le toeaia ma faapea ane, o la e ... le toeaia mai Falealupo, "O la e i ai lau \$100 la e teu i totonu o le UTOS, o lau \$100 lena o lea ou te umia ai le sea ou te pule ai i le Blue Sky, ou te pule ai i lea kamupani, ou te pule ai i lea kamupani. Ia, ona i ai lea o se leo o le toatele o tatou tagata nai lo le mea lea na sau ai, o le uma ane lava ua ave e le toaititi ae matamatafua le toatele. O lona uiga, o le vaegatupe la lena o le UTOS, o le agaga tonu lena na ala ai ona faatu le UTOS, o le avanoa e mafai ai ona omai le lautele o le atunuu, po o le a lava lau seleni o lo o i ai e te fia teuina i totonu o se teugatupe a lou atunuu, ia ma e mimita ai ma e faapea ane, "O au le isi tagata o lea e umia sea i lea kamupani ma lea kamupani a le atunuu." O lo o umia le tele o sea e i latou mai fafo.

## 9 OKETOPA 2013

**P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiaina aso 30 Iuni 2011 - Iloiloga**

Lau Afioga i le Fofoga Fetalai, o le faamalamalamaga atoa lena o le background o le faatuina o le Unit Trust of Samoa e pei ona i ai i le taimi lenei ma le agaga o le a pasia loa lea mea ae tatou see atu loa i isi mea.

**FOFOGA FETALAI:** Malo. Tulai mai le sui usufono mamalu mo Faleata Sisifo.

**Tofa LEALAILLEPULE RIMONI AIAFI:** Faafetai lava i lau Afioga mo le avanoa. E taua tele lenei Faalapotopotoga, ae i ai le mea e fia fesili ai i le Afioga i le Taitaifono, ona o lea e taua se tulaga maoae. Mai le 2008 e \$2.7miliona le tupe na faavae ai. E oo mai i le 2011 ua \$27miliona. A o lea e i ai le faanaunautauga e oo atu i le faaiuga o le tausaga na mavae atu nei 2012 ua oo i le \$40miliona. O le fesili la lea i le Afioga i le Taitaifono, pe ua maua mai se faamatalaga ua oo i se \$40miliona le tupe ua i totonu o le Unit Trust i le taimi nei.

O le isi vaega, o le Blue Sky, 25%. E leai se fautuaga e ave loa i ai e faatau atoa loa le Blue Sky pe faatau le 60% po o le 70% ae fai ia lelei. I lou talitonuga, faatoa tatou vaai lea ua tau sau i lalo tului o faletupe ina ua faatu le mea lenei. E tasi lenei mea e fai ma pologa i le atunuu ma tagata atiae o le maualuluga o tului, interest rate i faletupe ia tumaoti. Ae talu nei ona faatu le vaega lea, ua amata ona fai fuafua mai i ai tului o faletupe. Ae o le fesili foi la, o lea ua amata ona tatala i tua i Matagaluega a le Malo nonogatupe mai le teugatupe lenei e amatamata ai po o afea e ono faasafua mai ai le manuia lea i isi tagata faipisinisi ma isi tagata fai atinae i tului maualalo ia. Aua o le mea lea e i ai, o lea ua co-loop, ua galulue faatasi faletupe ona tuutuu lava lea o le tului i le maualuga lea e i ai nei, e le pau mai lalo.

O le isi mafuaaga lea ou te tilotilo agai i ai e le mafai ai ona tuutuu mai i lalo tului, o Matagaluega ia a tatou o le NPF ma le ACC, o latou ia o lea e tele tupe teu aua o la e foi e mananao latou e tele le tului e aumai. Peitai, afai la e demand pe avatu a latou teugatupe ia e teu ma avatu i ai ma se aiaiga i se ituaiga tului maualalo e totogi mai, e faigata foi la ona fetuunai i lalo ifo tului mo tagata lautele.

Ia o nai manatu na ma nai fesili na i le Afioga i le Taitaifono. Ma le faaaloalo lava. Faafetai.

**FOFOGA FETALAI:** Ia, tuu atu le avanoa i le tali atu a lau Afioga i le Palemia.

**Susuga Hon TUILAIEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, e le i soona aveatu le faamoemoe lena e \$40miliona o lo o avatu o se target e agai i ai fuafuaga.

## 9 OKETOPA 2013

P.P.2012/2013 Nu.48, Lipoti a le Komiti o Tupe Maua ma Tupe Totogi i le P.P.2011/2012 Nu.93, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le 16 masina faaiuina aso 30 Iuni 2011 - Iloiloga

O lo o i ai la latou galuega faatosina o lo o faia i fafo i Niu Sila, i o tatou tagata e mafai ona teu mai ai latou seleni. Ae aua le popole o lo o agai pea i ai galuega. O le tulaga foi i mea nei o faletupe, o le faatonutonuina o mea ia o tului, o le galuega tauave lena a le tatou Faletupe Tutotonu. E fuafua foi la le latou galuega tauave e siaki i mea o lo o fai e isi atunuu o le Pasefika.

Ia manatua foi o faletupe nei, o isi foi pisinisi e faavae le faaauau pea i totonu o Samoa i luga o a latou tupe maua. E i ai la le tulaga e lafo pea i gaoioiga o le tauvaga i le maketi, ae otometi lava le fetuutuunai ona o mea la ia. E tai pei o gaoioiga foi latou a le UTOS e influence ai foi lelele competition o lo o fai nei ma faapena ona faatonutonu ai le fesiitaiga o tului i le alu i luga ma le alu i lalo. A o mea faapenei, e i ai lava le faaeteetega leaga e maaleale. E fuafua foi le tauvaga o fai nei i tului o la e foi e fai i isi atunuu o le Pasefika. E faaeteete tele la le Malo e soona aapa tele i ai, ao lea e i ai auala indirectly e mafai ai ona faatonutonu malie atu, e faapei la o tulaga foi i gaoioiga e fai e le UTOS ma isi Faalapotopotoga tau tupe a le tatou Malo.

Lau Afioga i le Fofoga Fetalai, o le tali fesoasoani atu lena i le mataupu.

**FOFOGA FETALAI:** Malo faafetai. Tulai maia lau Afioga i le Taitaifono pe i ai se isi faaopoopoga.

**Susuga Hon PAPALHITELE NIKO LEE HANG:** Faafetai atu i lau Afioga i le Fofoga Fetalai mo le avanoa. E fia faafetaia foi le Afioga i le Palemia i le fesoasoani mai i le taliina o le matou Lipoti.

Na ona toe fia faaopoopo lau Afioga i le tulaga lea o le fesiligia o le target. Sa fesiligia foi e le matou Komiti le Tamaitai Pule i lana target lea e \$40miliona, ma o lana faamatalaga mai ia i matou e aua matou te popole, e ausia lava le target e pei ona fuafuaina.

O le tulaga lea na fesiligia ai le Blue Sky, sa leai se fautuaga a le matou Komiti ona o le manatu o le Komiti o la e lelei le fuafuaga lea, o la e foi e maua polofiti a le Blue Sky o lo o maua mai ai dividends a le tatou Malo. A o le matafaioi la lea, e tuu atu pea i le Komiti Faatonu ma le Malo e iloiloia lea tulaga, a o le tulaga o lo o taatia ai nei lea fuafuaga, o lo o lelei ma atoatoa ona o lea e maua mai fesoasoani e auala mai i dividends a le Blue Sky. Ma lou faaaloalo tele.

**FOFOGA FETALAI:** Malo faafetai.

*Na faamaonia le Lipoti.*

**9 OKETOPA 2013**

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu i Fautuaga na tuuina mai i le Malo mai le Lipoti a le Komiti Filifilia, ia le silia le 90 aso talu ona faamaonia e le Fono Aoa le Lipoti.

**P.P.2012/2013 NU.49, LIPOTI A LE KOMITI O MATAUPU  
TAU FAAMASINOVA, LEOLEO MA FALEPUIPUI MA  
FAAMASINOVA O FANUA MA SUAFA I LE P.P.2011/2012  
NU.81, LIPOTI FAALETAUSAGA A LE PULEGA O TINEU  
MU MA FAALAVELAVE TUTUPU FAAFUASEI MO LE  
TAUSAGA FAALETUPE 2008/2009 - ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa.

**O le le auai o le Afioga i le Taitaifono, o le a tulai mai le Afioga i le Sui Taitaifono.**

**Afioga AFOAFOUVALE JOHN MOORS (Sui Taitaifono, Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa):** Lau Afioga i le Fofoga Fetalai, ona o le toesea o le Taitaifono o le Komiti, o lea e fai ai au ma sui, ou te tulai atu ai e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faalua'ina e le sui usufono mo Falelatai ma Samatau ma se tasi o sui usufono mo Vaimauga Sisifo, Tofa Lenatai Victor Faafai Tamapua.*

**FOFOGA FETALAI:** Tulai mai le Sui Taitaifono e te saunoa i Fautuaga ma Iugafono a le Komiti.

**Afioga AFOAFOUVALE JOHN MOORS:** Lau Afioga i le Fofoga Fetalai:

**“SAILIILIGA:**

**O le Lipoti Faaletausaga a le Pulega o Tinei Mu ma Faalavelave Tutupu Faafuasei i Samoa mo Tausaga Faaletupe 2008/2009 o lo o auilili mai ai nisi o Polokalame o Fuafuaga Alualu Mamao ma Galuega Faatino sa mafai ona ausia e le Pulega i totonu o lenei tausaga faaletupe e pei ona lipoti mai.**



**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

O tiute ma matafaioi a le Pulega o Tinei Mu ma Faalavelave Tutupu Faafuasei o lo o aiaia i Vaega 4 o le Tulafono o Galuega Tinei Mu ma Faalavelave Tutupu Faafuasei o lo o aiaia i le Vaega 4 o le Tulafono o Galuega Tinei Mu ma Faalavelave Tutupu Faafuasei 2007, ma e aofia ai le saunia lea o auunaga tau i le tineia o mu, ma le puipuiga o le atunuu lautele mai so o se faalavelave tupu faafuasei.

**GALUEGA FAATINO SA AUSIA 2008/2009**

Ua maitauina e le Komiti, o Lipoti Faaletausaga Lona Lua leni a le Pulega o Tinei Mu ma Faalavelave Tutupu Faafuasei ua tuuina mai i le Palemene talu ona faamatuu ese mai le Pulega o Tinei Mu ma avea o se Pulega Tumaoti mai le pulega a le Matagaluega o Leoleo ma Falepuipui i le tausaga faaletupe 2006/2007.

Ua maitauina e le Komiti, e ui lava ina utiuti le faasoa a le Pulega e fua i luga o vaegatupe sa faamatuu atu mo le Pulega mo le tauaveina o ana matafaioi ma auunaga masani, ae sa mafai lava e le Pulega ona tali atu i faalavelave tutupu faafuasei sa tutupu i tausaga faaletupe e pei ona lipotia mai.

E ui lava i faafitauli sa feagai ma le Pulega i le tausaga faaletupe 2008/2009 i le faatulagaina ai o lana pulega fou, ae peitai na maitauina ni suiga i le sologa lelei i le amataga o le tausaga faaletupe 2007/2008 e ala i le faatinoga o galuega ma auunaga lautele a le Pulega. Na taua e le Pulega, e le i nofoai le Pulega i le sailia lea o ni auala e maua mai ai ni fesoasoani i atunuu o lo o faipaaga ma le Malo o Samoa, faatasi ai ma isi Faalapotopotoga Faava o Malo i fafo na mafai ona maua mai fesoasoani e ala i le tuuina mai faameaalofa o nisi o meafaigaluega mo le Pulega.

O lo o faamauina i le Lipoti nisi o fesoasoani sa faatalosagaina e le Pulega i Pisinisi Tumaoti lea sa tuuina mai ai foi ni taavale e lua e faaopoopo i aseta a le Pulega mo ana galuega laveai. Na fesoasoani atu foi le Kamupani o le SamoaTel mo ni taavale mo gasegase ma loli-vai PPS-17,000 litre mo le Pulega.

E le gata i lea, ae na taua foi e le pulega le lagolago malosi o le Malo o Ausetalia ma Niu Sila i le tuuina mai o ni taavale fuimu faatasi ai ma meafaigaluega aua lava le faaleleia atili o le auunaga.

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

Na taua foi e le Pulega lo latou agaga faafetai ona o le agalelei o nei Malo mo le ofoina mai foi o tagata tomai faapitoa mo le faatinoina o polokalame faaleaoaoga mo le aufaigaluega a le Pulega.

Ua maitauina foi e le Komiti le galulue soosootauau ai o le Pulega ma le Vaega o Faalavelave Tutupu Faafuasei o lo o i lalo o le Matagaluega o Punaoa Faanatura ma le Siosiomaga i le mataituina lea o polokalame faalauiloa mo le atunuu lautele i le tali atu i so o se faalavelave e ono aafia ai lo tatou atunuu.

O se tulaga na faafiafiaina ai le Komiti, ona sa amata faatinoina i le tausaga faaletupe 2007/2008 ona faatinoina e le Pulega o Tinei Mu ana polokalame faalauiloa i aoga eseese i totonu o le atunuu i auala e aoaoina ai le fanau mo le tali atu i se mu e aafia ai lo latou siosiomaga e le gata i totonu o faleaoga, ae faapea foi i ni faalavelave tutupu faafuasei e tulai mai i totonu o aiga ma so o se nofoaga i totonu o le atunuu.

E pei ona lipotia mai i le Lipoti Faaletausaga, o Fepuari 2008 na faamaonia ai e le Komisi e Pulea Tagata Faigaluega a le Malo ma le Matagaluega o Tupe le faafaigaluegaina ai o Alii tinei mu e 18. Na taua e le Pulega ua avea lea tulaga ma fesoasoani tele i le Pulega aua lava tulaga tau i le faaleleia o le auaunaga aemaise lava i le vaitau tonu lena a o tau faatulaga ma faamautu le Pulega talu ona tuueseeseina mai le vaaiga a le Matagaluega o Leoleo ma Falepuipui

**FAAFETAI:**

E faamauina le agaga faafetai a le Komiti i le Pulega o Tinei Mu ma Faalavelave Tutupu Faafuasei e le gata i polokalame faalauiloa o lo o faasalalauina i luga o alaleo o leitio ma televise faasalalau aua lava le saogalemu ai o le atunuu lautele.

Ua maitauina e le Komiti i lana asiasiga le lelei faafoe e le Pulega o ana meatotino ma meafaigaluega i so o se nofoaga lava a le Pulega o Tinei Mu e pei ona asia e le Komiti e le gata i lana nofoaga autu i Apia, ae faapea foi i lana nofoaga i Tuanaimato. Na maitaina foi e le Komiti tulaga lelei ma le mautu ua i ai nei le auaunaga a le Pulega i le motu tele i Salafai i lana nofoaga fou o lo o i Asau.

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

**FAUTUAGA:**

**I le faia i luga o ana Saililiga, e fautuaina ai e le Komiti le Malo:-**

- 1. Ia faaauauina pea polokalame faalauiloa a le Pulega e ala i faasalalauga i luga o le televise ma leitio i le taua o le nofo silafia e le atunuu lautele o gaioiga talafeagai e ao ona faatino i taimi e tutupu mai ai faalavelave faafuasei e le gata i mu, ae faapea foi i faalavelave faale-natura e ono aafia ai Samoa i le lumanai e pei o le galulolo na aafia ai lo tatou atunuu.**
- 2. Ia faamalositia Faiga Faavae ma Taiala talafeagai (building codes) e ao ona faamalositia ma usitaia mo le fausiaina o so o se Fale tele aemaise lava i totonu o le Taulaga, ina ia mautinoa ua tuuina atu i ai ma le maliega a le Pulega o Tinei Mu a o le i pasiaina so o se fale mo le fausiaina. E manatu le Komiti i le taua tele o le usitaia o nei aiaiga aua lava le saogalemu ai o nei fale aemaise o le soifua o tagata pe afai ae aafia i se faalavelave faafuasei tau mu e ono aafia ai i se nofoaga i totonu o le taulaga.**
- 3. Ina ia mataitu ma molia i le Tulafono i latou o lo o faia pea amio faasolitulafono o le susunuina lea o vaomatua i tuamaota ma tualaoa i nisi o nuu ma afioaga i totonu o le atunuu, ma ua ave lea ma popolega i le Pulega o Tinei Mu aemaise lava i le vaitau o mugala ona e le gata ina aafia ai le tele o taimi faaalu o tagata faigaluega a le Pulega i le tau tinea o ia faalavelave tau mu na tulai mai i tausaga ua tuanai, ae faapea foi ona tele ma siitia ai tupe faaalu a le Pulega talu ai lava le le faautauta o ia tagata.**

**IUGAFONO:**

**I le maea ai o Iloiloga a le Komiti, na faaiugafonoina ai e fautuaina le Fono Aoa,**

**Ina ia faamaonia le P.P.2011/2012 Nu.81, Lipoti Faaletausaga a le Pulega o Tinei Mu ma Faalavelave Tutupu Faafuasei i Samoa mo le Tausaga Faaletupe 2008/2009.”**

**Ma lou faaaloalo lava..**

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

**FOFOGA FETALAI:** Malo faafetai i lau Afioga i le Taitaifono. Ia, o le a tuu atu le avanoa, o lea e i ai sui usufono ia e fia saunoa i le Lipoti.

O le a tuu atu muamua le avanoa i le sui usufono mo Gagaemauga Nu.2.

**Tofa LEVAOPOLO TALATONU:** Faafetai i lau Afioga mo le avanoa. E leai na ona faafesili atu lava i le Afioga i le Taitaifono ona o lea e faataua mai lava le tulaga o le safety po o le saogalemu foi o tatou tagata, e le gata i tatou nuu i tua, aemaise lava totonu o le taulaga.

O le faafesili lau Afioga i le Fofoga Fetalai i le Taitaifono, po o le a se tulaga o le tapenaga a le tatou Matagaluega i mea ia pe a tulai mai ni faalavelave i mu vaetu le faafogafoga a le atunuu i o tatou faletetele ia ua i ai, fogafale fa, fogafale lima ma le fale fogafale ono. Aua i le maitau ma le totoa i le tulaga o lo o i ai a tatou meafaigaluega po o facilities ma equipment a le Tinei Mu, e i ai lava le agaga e le o atoatoa, aua e le... O mea foi ia e pei o tatou taavale ia e i ai apefai i le alu i luga e vave ai ona omai i lalo nisi o galulue i luga, i mea lava tau emergencies foi nei. Pe le o i ai se fuafuaga faapena a le tatou Matagaluega o i ai, po o i ai se tulaga faapena ua uma ona faataoto aua le saogalemu o tagata faigaluega a le tatou atunuu. Ma le agaga faaloalo.

**FOFOGA FETALAI:** Malo. Ia, tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai lava i lau Afioga. Faafetai foi i lenei Lipoti ua avatu ai se manatu. O au nei sa ou i ai ma lou aiga i Asau i le weekend, na matou taunuu po o le Aso Tofi. Oo loa i le taeao ua ee le sailini, ua oso mai nei lou toalua ua fafagu matou ma lau fanau matou te o i fafo o le faalavelave ua tupu. Ua laki la o lou manatua e i ai le fale fuimu i o. Ou fai atu, “E leai, e pei lava o le fale fuimu la e tatou te faafesagai i gauta i o.” E le gata la ina ee i le 9 i le taeao, toe ee i le 1, toe ee i le 5 i le afiafi. E faatolu ona ee i le aso. O le uiga la o lau tala, po o le a le mafuaaga aua o lea tatou te iloa i taimi i aso e leai ni uati. O le isi mea, i fesetai ai ma tagata foi nei i taimi o Tsunami ma warning foi nei faapitoa, ona o le a pei e taitaliga i tagata le ee faasoloatoa i aso uma aso uma. E oo la i le ee foi lea o se faalavelave faafuasei ae faapea le toeaina, “Se o le ee masani lava a nai tama o la e test le latou pu po o ola.” A ua aoga la le Tulafono lau Afioga, se i toe tagai ane i ai le tou Matagaluega ma lau Afioga i le Minisita po o talafeagai pea lea faiga i le ee faatolu i le aso, pe le ono foi lele i taimi o faalavelave e tata ai ona faaee lea e sefe ai foi lena malosi.

O le isi mea, sa ou faamanatu pea le numera lea.....

**9 OKETOPA 2013**

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

**FOFOGA FETALAI:** Malie lau Afioga i le sui usufono mamalu se i faamalalalama atu le uiga o le sailini lea.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o au ua ou faanoanoa tele i le sui usufono, o lea e ee lava i fafo ane le sailini ae le fesili i ai pe mafua i se a. O i ina e tau mai ai le lagolago tele o le Matagaluega i le atiaeina o lona vaega o le atunuu. A leai loa se afi, ee i le 9 ina ia feala tagata e o e galulue, ta le 12 malolo mai e tausasami, ta le 5 ua malolo. Vaai i ai i le taua o le faaogaina o le sailini? O aso ia, sa ee le tatou sailini iinei i le ta o le 7, toe ee i le afiafi, a ua le ee i le 12 ona o aso na sa faasoloatoa lava le galulue o tagata. Ae sa faailo le taimi e amata ai galuega i le taeao, faailo foi le taimi e uma ai galuega. O lona uiga la, e tele lava le galuega a le sailini lona i le atiaeina o lona itu o Asau. Ae ana e silafia, se i vaai i ai o lona sa ee i le 9 a o lona sa e moe? Ua matua leaga tele lava le mea na e faia. O le agaga lona, ia laga tagata e o e galulue i le taeao.

**FOFOGA FETALAI:** Malo. Tulai mai le sui usufono mamalu.

Tofa LEALAILEPULE RIMONI AIAFI: Lau Afioga i le Fofoga Fetalai, ia manatua foi vaegaau, e faamoemoe i le pu. A ili loa le pu, e ese le sound o le attack, ese le sound o le alo i lalo. O le mea la ua tupu, ua sau le osofaiga, e muamua oti le ilipu, tu atu loa le toeaia na sosoo fao le pu ae ili. O le mea la ua tupu, ua le iloa e tagata po o le a le ituaiga pu lea e ili mai. O le afu la, na feoti uma le autau, ona ua masani lava i le pu lea e ili soo ae tataua ona taofiofi, e i ai le taimi faapitoa e ili ai le pu.

O le isi mea, o au sa ou alu ou te malolo. Sa i ai lou manatu ou te ala po o le 12 i le aoauli, a ua faaala au e le pu lenei i le 9 i le taeao.

**FOFOGA FETALAI:** Malie le sui usufono mamalu, leaga o lea ua e taua Matia ma Matia Ituau. O le a se i tuu mai la leaga o le sui usufono o ia tonu lea sa i ai i le tatalaina o le sailini lea. Se i tulai mai le sui usufono mo Vaisigano Nu.1.

Afioga Tufuga Gafaleata Faitua (Vaisigano Nu.1): Lau Afioga i le Fofoga Fetalai, e faamalulu atu i le sui usufono mamalu, leai e le o se ilipu muamua le la foi itu o le atunuu. Leai e tutusa lelei lava le fuimu iinei ma Savaii fou. O la e taumafai a ili foi le sailini iinei i le taimi lea, e faapena foi ona ili mai Savaii. Ua masani ai foi le matou itumalo i le sailini, a o le uso nei, e faamalulu atu pe afai faatoa e taunuu atu lea i le motu.

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

**FOFOGA FETALAI:** Malie le sui usufono mo Faleata Sisifo, o le isi lea vaega, o lea e tulai mai le Minisita mo Galuega, Felauaiga ma Atinae Eseeese.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese):** Lau Afioga i le Fofoga Fetalai, na o se faamanatu i le Afioga i le sui usufono, o Asau o le isi vaega lea o la e tele ai ofisa o le Malo, lena e i ai le Ofisa o Faatoaga, o le Ofisa o Vaomatua, o le malae vaalele, o le uafu ma le Ofisa o le Vai. O i latou uma na e pei foi o le fuafuaga lea e i ai le taulaga nei, ne i te'i ua faagaloina le taua o Asau.

**Tofa LEALAILEPULE RIMONI AIAFI:** Lau Afioga, ou te musu e faafinauina lena vaega. O le pu lava lena sa ili i aso ia, o le leai o ni uati a nai tagata. O lea ua tofu tatou ma uati, ae le afaina. A o le mea la aua leaga o lea na saunoa le Palemia pe na ou oo i ai, na ou oo i ai. O le mea la i lau maitau i ai i le fale fuimu, o fale fuimu uma o le lalolagi e faasasaga i le auala, a o le fale fuimu lea e faasaga i le togavao. A o le mea la ua tupu, a ili le pu, ae i ai ma le ulu e tu ai i autafa. A tupu la se faalavelave e taamilo le taavale fuimu i le ulu ma le Ofisa o Faatoaga faatoa oo mai i le auala. E oo mai i le auala ua uma le mu. Se i toe tagai i ai le Matagaluega.....

**FOFOGA FETALAI:** Se i tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le tatou Ofisa lea o le Fuimu i Savaii, e le i soona faatuina ma filifilia le vaega lea, e le gata o fale latou te leoina, a o le togavao e mu soo. Masalo ua galo i le sui usufono, o le tausaga e 1983, toetiiti atoa le masina o mu le vaomatua i Savaii. O lea la e le gata ina faatauaina o maota, ae toe faatauaina ma le vaomatua. O lona uiga, e leai lava se mea o faaletonu, o i ina e aliali mai ai le mamao tele o le tofa ia i latou o lo o pulea le tatou fuimu.

**FOFOGA FETALAI:** Ia, faaii maia le saunoaga o lea ua manino le sui usufono mo Faleata Sisifo.

**Tofa Lealailepule Rimoni Aiafi:** Na pau lava lena o le fautuaga e toe tagai i ai lau Afioga i le Minisita, o le fale fuimu, e le faasaga i le auala, e le faasaga i le togavao, ae faasaga mai, ou te le iloa tonu po o fea le mea la e faasaga i ai lau Afioga.

P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga

**FOFOGA FETALAI:** Ou te faamalamalama atu i le sui usufono, e le taua le faasaga i le auala, e taua le faasaga i le mea o la e masani ona mu, o le togavao. O lou itumalo lea e masani ona mafatia. E ala ona faasaga le fale fuimu i le togavao, ia mu loa le togavao agai sao loa i ai le taavale fuimu. Ma le mea lea, ia silafia foi le manulauti a le Malo, o le mea e lelei i Apia e lelei foi i Savaii. A 'e'e le sailigi i le taulaga i Tauese, ia 'e'e foi le sailigi i Savaii. O le tasi lea nuu i totonu o Savaii o lo o taua o le taulaga i aso ia o Asau. O la e i ai le uafu, o la e i ai le malae vaalele, o la e i ai uma Matagaluega a le Malo. O lona uiga, e tatau foi ona ee le sailigi isi o matou faaitu, ae tulai maia o lea ua manino le sailigi, agai i le isi tulaga le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai. E leai e le fesiligia le aoga o le fale fuimu ma le Malo i lau Afioga i le Minisita, ese lenei Minisita le sogasoga ma le galue, e tele ana Tulafono, o lea foi faatoa pasi le isi Tulafono, ia a o lea foi ua tatou talanoa i lana fale fuimu. Ia ae o le tulaga lau Afioga e fautuaina, sei tagai i le tulaga o lau fale fuimu ma le mea e faasaga i ai, le mau pu ia po o le a taimi e ono faaoga ai. Ae toe tasi lava le luitau i lau Afioga, aso ia na tatou ola mai e tasi lava le numera e vili pe a i ai se faalavelave faafuasei, o le 999, e oo mai i le aso e tatou te manatua pea, ia a o le taimi nei, pei ua ese le numera a le fuimu, ese le numera a leoleo, ese foi le numera i isi vaega o lo o nafa ma...a o lea ua tupu pea ia i tatou le tele o faalavelave ma tulaga e pei ona e silafia, e tatau ona toe galulue le tatou Matagaluega ia tasi se numera, pei o numera foi nei e masani ai atunuu i fafo o le 911, po o se numera faapena e centralize ai call o mea nei; ia ma le faaaloalo lava i lau Afioga, faafetai.

**FOFOGA FETALAI:** Malo faafetai. Ia tulai mai lau Afioga i le Sui Taitaifono.

**Afioga AFOAFOUVALE JOHN MOORS:** Faafetai i lau Afioga i le Fofoga Fetalai. O lona ua maea e faafetai atu i le Minisita aemaise le Palemia e tusa ai foi i le fesoasoani i le tali atu i faafesili a sui usufono mamalu o le Maota, ae e toe tasi le fesili lea ou te maitau atu e lei maea ona tuuina atu i ai se tali, o le fesili a lou uso a sui usufono mo Gagaemauga Nu. 2. Ia e faafetai atu e tusa ai foi ma fautuaga na tuuina mai e tusa ai ma fale tetele o lo o i ai i nei i le taulaga. O le tulaga lava lona sa i ai le asiasiga a le Komiti ina ia vaavaai ma fesiligia le Matagaluega e tusa ai ma le gafatia o le faatinoina o le latou gaoioiga pe a tutupu mai ni faalavelave i fale tetele ia. O fuafuaga n amo le lumanai ina ia aumai ni apetai, se i tulou, e gafatia le maualuluga o fale nei.

**P.P.2012/2013 Nu.49, Lipoti a le Komiti o Mataupu tau  
Faamasinoga, Leoleo ma Falepuipui ma Faamasinoga o Fanua ma  
Suafa i le P.P.2011/2012 Nu.81, Lipoti Faaletausaga a le Pulega o Tinei  
Mu ma Faalavelave Tutupu Faafuasei mo le tausaga faaletupe  
2008/2009 - Iloiloga**

E le gata i lea o masini faapitoa e faapena ona momoli atu ai le suavai e tinea ia ni mu e tulai mai, ia ma o fale foi o lo o faapea ona maea fausia nei o fale fou, o lena ua tofu lava foi nei maota ma ituaiga metotia o lo o pipii i ai i totoga o fale e faapea foi ona fesoasoani i nei ituaiga faalavelave. Ia o le tali atu lea ma le faaloalo lava.

**FOFOGA FETALAI:** Malo faafetai. Ia malie lau Afioga i le Minisita sei tuu mai le tali faaopoopo.

**Afioga Hon SALA FATA LISATI PINATI:** Lau Afioga i le Fofoga Fetalai o nai mea faaopoopo e tusa ai ma le saunoaga matagoffie a le sui usufono.

O le mataupu lea na laga e tusa ai ma taavale ia i fale tetele i le taulaga, e moni o lo o i ai le atugaluga o le Matagaluega e le gafatia e taavale o lo o i ai i le taimi nei ia le auaunaga, ae o lo o faapea ona tausaili pea ma faatalatalanoa nisi taavaleafi fuimu tetele aua la le fuafuaga la lea i le tinea o mu pe afai e aafia ni fale tetele o lo o i ai nei i le taulaga. Mo lo outou silafia, e le na ma le laina, o lo o faapea ona taumafai pea le Matagaluega ina ia ogatasi ma fuafuaga a le Malo i fale tetele ia atoa ai foi ma le auaunaga ina ia faatulaga i se tulaga e mafai ai ona tinea mu tetele, o le ala foi lea o lo o tausaili ae o le manumanuga lava o tupe lava, pei o le agaga lea o lo o faapea ona tautoai ai ma tau fetuutuunai i se vaegatupe, aua o le tau lava ia o le taavale ou te le toe masalo e faitau miliona ma miliona le tau o le taavale, ae mo le taimi nei o lo o faapena ona faagasolo.

A o le fesili e uiga i le faitotoa lea ma le fale i Asau, ia ma le tulaga lea i taimi, ia amuia foi Salafai latou, amuia ia le itumalo i Asau o lo o i ai le latou faalogo foi e fofoga i ai ia le itumalo pe a oo ina sasao ni afi. Ae o le tulaga lea i faitotoa, o lo o i ai le fuafuaga o lo o faataatia e toe saili le auala e toe aveese mai le nofoaga lea e i ai le auala i le taimi nei ae toe aumai i le isi itu, ina ia mafai ai ona faataunuu le auaunaga e tusa ai ma fuafuaga, a o le faagasologa lava ia o le faataatiaga o le fale, ia masalo o le itumalo lea o le Fofoga Fetalai, o le itu lava lea i Asau ma Aopo, o Aopo lava lea e tele ina mu. O le ala foi lea a fesiligia po o le a le mea ua taatia ai faapea le fale, ia e pei e ala ona faasaga agai i le itu lea, ina ia talafeauga ma le tulaga la lea ia aua ne'i i ai se isi ia mataala le afaigaluega, e mu loa fai loa ma le galuega; ma le faaloalo lava.

**FOFOGA FETALAI:** Malo. A gasea lava le faautaga i lau Afioga i le Minisita o lo o manino. O nai o tatou itumalo e faasasaga i mea ia e masani ona mu ma tupu ai faalavelave.



**9 OKETOPA 2013**

**P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga**

**O le ala faasaga lea o le tatou fale tinei mu i le itu lea, ae faafetai atu o lea ua malamalama lau fesoasoani lau Afioga i le Sui Taitaifono.**

*Na faamaonia le Lipoti.*

**FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.**

**P.P. 2012/2013 NU. 86, LIPOTI A LE KOMITI O FAAFOEGA TAU PULEGA A LE MALO I LE P.P. 2012/2013 NU. 17, LIPOTI FAALETAUSAGA A LE MATAGALUEGA O LE PALEMIA MA LE KAPENETA MO LE TAUSAGA IULAI 2010-IUNI 2011 – ILOILOGA**

**FOFOGA FETALAI: Tulai mai lau Afioga i le Taitaifono o le Komiti o Faafoga tau Pulega a le Malo.**

**I le toesea ai o le Afioga i le Taitaifono, tulai mai lau Afioga i le Sui Taitaifono.**

**Afioga Hon AEAU PENIAMINA LEAVAISEETA (Sui Taitaifono, Komiti o Faafoga tau Pulega a le Malo): I le toesea ai o le Afioga i le Taitaifono o le Komiti o Faafoga tau Pulega a le Malo, lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.***

*Faaluaina e le Taitai o le Itu Agai ma le sui usufono mo Faleata Sisifo.*

**FOFOGA FETALAI: Tulai mai lau Afioga i le Sui Taitaifono mo Fautuaga ma Iugafono.**

**Afioga Hon AEAU PENIAMINA LEAVAISEETA: O Sailiiliga, Fautuaga ma Iugafono:-**

**“SAILIILIGA:**

**O le Lipoti Faaletausaga 2010-2011 a le Matagaluega o le Palemia ma le Kapeneta o lo o atagia ai le faatinoina o le latou pitolaau e tusa ma aiaiga o le *Tulafono o Galuega a le Malo 2004 ma le Tulafono o le Pulega o Tupe a le Malo 2001.***

## 9 OKETOPA 2013

**P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga**

O ia auunaga sa faatinoina mo le Ofisa o le Le Ao Mamalu O Le Malo, Ofisa o le Fono a Sui Tofia, Ofisa o le Kapeneta, Vaega o Auunaga Lautele, Ofisa o Fesootaiga ma Soupu, Vaega e Tuliloaina ma Mataituina Faiga Faavae a le Malo, Vaega e Faafoga Fesoasoani Tupe aua Polokalame, faapea ai ma Auunaga Tau Femalagaiga, tautua o lo o soosootauau ai Niu Sila, Ausetalia ma le Malo, Polokalame mo avanoa faigaluega faavaitaimi.

### **FAUTUAGA:**

I le maea ai o ana Saililiga, na faaiugafonoina ai e le Komiti e fautuaina le Malo ina ia:

1. Silasila i le sailia o nisi avanoa mo le faafaigaluegaina o tatou tagata i galuega faavaitaimi ina ia faaauuina pea lea polokalame e saili manuia ai o tatou tagata mo le atinaeina o Aiga, Nuu ma Ekalesia aemaise ai le tamaoiga o Samoa. Ia faamalasia pea feutagaiga mo nisi galuega talafeagai mo o tatou tagata e le gata i Niu Sila ma Ausetalia ae faapea foi ma isi atunuu i fafo.
2. Ia silasila totoa i aiaiga ma taiala mo talosaga a tagata e fia ulufale mai i Samoa ma ia faapea ona faamalasia le faatinoina o tulafono talafeagai ina ia malupuipua Samoa mai le ulufale mai o tagata solitulafono mai isi atunuu o le lalolagi.
3. Tuuina mai o le Nusipepa aloaia a le Malo (Savali) e le gata i kopi faa-Peretania ae faapea ai foi le faa-Samoa, mo sui usufono mamalu uma o le Palemene i a latou pusameli i le Maota o Tofilau Eti Alesana i Mulinuu ina ia lava ai lo latou silafia i fuafuaga fai a le Malo aemaise ai le faatupu manatu lelei aua le faafeagai ai ma o latou itumalo aemaise o le atunuu.

### **IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao: Ina ia faamaonia le P.P. 2012/2013 Nu. 17, Lipoti Faaletausaga a le Matagaluega o le Palemia ma le Kapeneta Iulai 2010-Iuni 2011.”

**Faafetai.**

**9 OKETOPA 2013**

**P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga**

**FOFOGA FETALAI:** Malo faafetai i le laulauga o le Iugafono ma Fautuaga a le tatou Komiti lau Afioga i le Sui Taitaifono. O lo o i ai le sui usufono lea e fia saunoa, se tasi o sui usufono mo Palota Taitoatasi, Susuga Hon Papaliitele Niko Lee Hang, tulai mai.

**Susuga Hon PAPALIITELE NIKO LEE HANG:** Faafetai i lau Afioga i le Fofoga Fetalai, e faafesili atu lava i le Afioga i le Sui Taitaifono ona o le Lipoti lea a le Ofisa o lo o taua ai se tupe o lo o totoe mai le Ofisa o le Savali, ona e maitau e lou nei sui usufono o lo o tele se aitalafu o le Savali i le tatou fale Lomitusi. Po o le a se fuafuaga i lenei tupe o lo o faasili ae le ave e totogi ai aitalafu ia, ma lou faaaloalo tele.

**FOFOGA FETALAI:** Malie lau Afioga i le Sui Taitaifono, sei tulai mai le sui usufono mamalu mo le saunoaga.

**Tofa LEVAOPOLO TALATONU:** Faafetai i lau Afioga i le Fofoga Fetalai, leai e puupuu lava foi se manatu, e taua ia o le tulaga lea o tagata faigaluega po o tatou kegi foi ia e avatu i atunuu i fafo po o Niu Sila aemaise lava Niu Sila. E tele lava ia tulaga e pei foi ona aliae mai, o le i ai o nisi foi ia e amio paaa, vaeatu foi le faafogafoga a le atunuu ia ua tauvalea atu ai isi alaafaga. Ae o le faiga lea e fai ai nei, e le tasi se alaafaga e omai uma ai ia tagata faigaluega pei e aumai solo foi ia e eseese uma lava nuu e omai ai lea vaega ma lea vaega, ae afai la o se tulaga faaletonu o se tasi o le isi nuu, ia e tauvalea ai le isi nuu. Pei o le tulaga lena e avatu lava se tuualalo foi lea, e a pe a faasolosolo i o tatou nuu uma, ia a uma mai le kegi a lea nuu ia sosoo atu le isi kegi, ia faasafua ia lea foi faamanuiga i le tatou atunuu atoa. Pei foi ona i ai se atugaluga e fai e le isi ae faaletonu ai ma tauvalea ai le isi nuu. Pei o se vaifofo lena ae faasolosolo i o tatou nuu ia faamanuiga ia, ma le agaga faaaloalo.

**FOFOGA FETALAI:** Malo.

**Tofa Aveau Tuala Lepale Niko Palamo:** Lau Afioga i le Fofoga Fetalai....

**FOFOGA FETALAI:** Malie lau Afioga o lea e i ai le tali, sei tulai mai lau Afioga i le Palemia ae lei tulai mai le sui usufono mamalu, tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Sei uma mai le mea le la ona ou tulai atu lea.

## **9 OKETOPA 2013**

**P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga**

**FOFOGA FETALAI:** Ia o lea ua tuu atu le avanoa le sui usufono mo Faleata Sasae, tulai mai.

**Tofa AVEAU TUALA LEPALE NIKO:** Faafetai lava i lau Afioga i le Fofoga Fetalai, leai e puupuu lava le mataupu lea ou te fia fesili ai pei ona fuafua i le fautuaga lea ua tuuina mai i le Lipoti lea, ina ia talosagaina le Matagaluega e vaai faalelei le vaega foi lea e omai i totonu o Samoa a o lea sa solitulafono i atunuu i fafo.

O lo o maitauina lau Afioga i le Fofoga Fetalai, e le o lava le puipuiga a le Matagaluega i ituiga tagata ia e o mai i totonu o Samoa ona e foliga mai i totonu o se tasi o vaega o le Ofisa lea o le Immigration, ona pau lava le mea o lo o faataua i le taimi lenei, o le lelei o le passport ia valid ma ia i ai se ticket e mafai ai ona toe foi, ae a sau le tagata sa falepuipui pe sa solitulafono i atunuu i fafo, e le o i ai se puipuiga i totonu i i e mafai ai ona fesiligia le tagata lea i le auala e ala ai ona oo mai i Samoa. E pei o le auala lea ou te fia tulai atu ai ona e tataua ona i ai se vaega e faamalosi ai le vaega lea, ae aua ne i faatauaina na o le ticket e sau ai ma le valid o le passport, ae ia silasila i itu uma ia.

Ma le faaaloalo lava.

**FOFOGA FETALAI:** Malo faafetai. Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielega:** Lau Afioga i le Fofoga Fetalai, o le mataupu lea i le Savali; e le i lea atu ona fai le faiga faavae lea a le Malo e faafaigofie ai ona soloia aitalafu, ae faatino e le Ofisa o le Tupe aua o latou ia o le nofoaga tutotonu e taulai i ai mataupu tau tupe. E faigofie la ona soloia seleni nei i totonu o vaegatupe faaalu ma vaegatupe maua e book entry, ona cancel ai lea o aitalafu nai lo le mea lea o le tuufau atu pea se i ioe le Matagaluega ona faatoa totogi lea o le latou aitalafu. A o la e i ai auala e aupito sili ona faigofie e faatino ai i le va lea o lea itu tino o le Malo ma lea itu tino o le Malo, ma o le matua faigofie lava.

Ua uma la ona fai le faiga faavae lea atonu e le i oo i ai le faasologa a le Matagaluega o Tupe. O le faiga faavae lena na mafua ona taunuu i ai ona o le isi foi fautuaga na tulai mai i totonu o felafolafoaiga a le Palemene lenei, i le i ai o le Matagaluega e nofo aitalafu i le EPC po o le Pulega o le Suavai, aua e i ai lava le agaga foi lea e tupu ae pea, uiga faale-tagata e faapea, ia o Faalapotopotoga a le Malo, faafaulai ai pea. Afai a o a tupe e totoe ave e fai ai isi mea ae faafaulai ai pea i ina e le afaina aua o le isi foi itutino o le Malo.

E faigofie i le faiga foi lea o le offset aua na ona toese mai lava o la outou vaegatupe mai i faaopoopoga i o ae ave ma tupe maua a le isi vaega; ia uma, cancel. Na o le pau lava le mea o le book entry ona faigofie lea.

P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga

O le mea o le accounting process e faafaigofie ai mea ia. O le mafuaaga e tupu ai pea mea ia ona e i ai amio a isi officials a le Malo, a oo loa ina latalata i le faaiuga o le tausaga ua tele mea e moomia, ona amata loa lea ona le toe totogia se tupe i o i aitalafu ona e vave uma ai le latou tupe ma le oo ai i le faaiuga o le tausaga mea la e mananao e fai. Ua nonofo lava latou ma ave i ai le faamuamua. E pei la o se faiga faapea e faafaigofie ai ona soloia ia ituaiga uiga ia e ono tutupu mai, aemaise foi o le nofo o le Accounting Officer ma taofiofi le totogiina, ae aveane le mea lea e faatau mai ai sa latou masini photocopy ua leva ona leaga, a o tupe o lea sa fuafua e faagaioi ai aitalafu i le va lea po o le EPC i le latou eletise po o le Water Authority i le latou suavai, po o le Printing foi. O le ala foi lena a outou silasila i ai i Faalapotopotoga nei, e aupito i tetele lava aitalafu a isi itu tino o le Malo ona o uiga augata ia e faaono tutupu ona e mafua ia i latou o lo o vaaia mea tau tupe.

E le o se gaioiga la e fou nei, na tatou Tutoatasi mai lava o fai ma o la lava e fai. A o le faiga faigofie la lea na ona laa lava i ai o le Treasury offset, ona uma lava lea. E leai se mea e tele ai fua le pisa ma saga eleelea ai pepa a le Malo.

O le mataupu lea sa laga mai i tagata e ave i fafo i galuega faavaitaimi, o le mea lea o lo o ave pea i ai le faatau a le Malo. E faatolu ona ou malaga ma ou afea Niu Sila ma ou afea ai foi Faalapotopotoga ia i faatoaga ma matou talanoa pea i le faaopoopoina atu o o tatou tagata galulue. Na matou o foi vaai mea e nonofo ai ma ou ai ai i totonu o fale aiga ia e aai ai i latou ina ia ou iloa ai services nei o lo o faatino. O le matua lelei lava o taumafaiga nei e fai e le aufai faatoaga a Niu Sila. O le mea e tatalo ai latou e moomia tele tagata na o atu muamua o mai toe o atu, ona o leni e le toe maimauina se taimi e toe aoao ai i le tauina o le apu ma le tuu pusaina o apu, ona o tagata na o atu muamua ua matua tele le poto masani. O le talosaga a latou ia e i luga atu laitiiti i le afa po o le 60% o tagata na omai ia toe foi atu, a o le mea foi lena o lea e taumafai tatou e tau faasoasoa aua e le faapea ua tofufufusia uma afioaga, ae i ai la ma tagata e sao atu ai ona o leni, e i ai tagata e ave faaalatua e nisi foi o le atunuu sa latou faia le faiga lea muamua ma ua talitonuina foi la e le aufaifaatoaga leni. O lea la sa tuu avanoa i ai e le gata ina faia e le Malo ia faigamalaga nei, ae ua faataga foi i latou ia i tua. O latou la na o lea ua sao ai mea piopio ma mea ia ua tutupu nei ma o lea foi la ua faataoto ai faiga faavae o le a increasingly, o le a faaopoopo pea ona tauave e le Malo ae le toe tuua i tua.

Ma le isi mea lea ua tupu, e i ai i latou o le au faatautala ua sao atu ai i totonu ma o fai uiga mataga e pei o le toso tiene ma fai uiga mataga i tamaitai. O le vaega la lena na ona tupu lava o mea faapena toe faafoi lelei mai lava.

P.P.2012/2013 Nu.86, Lipoti a le Komiti o Faafoga tau Pulega a le Malo i le P.P.2012/2013 Nu.17, Lipoti Faaletausaga a le Matagaluega a le Palemia ma le Kapeneta mo le tausaga Iulai 2010-Iuni 2011  
– Iloiloga

O lo o i ai le tatou policy o le zero tolerance, e matua leai lava ma se avanoa e toe tuua i ai. Na ona faaletonu lava aumai ona o le tauvalea ai o tatou e faaono taofia ai e le Malo o Niu Sila le faaauau pea pe afai e sao pea tagata leaga nei i fafo. O lea la ua toe tuu i ai ma le isi puipuiga, o le nuu lava na e sau ai e le toe alu lava se tagata o lena nuu i fafo. O le agaga ina ia aafia ai ma pulega mamalu a Alii ma Faipule e fai i ai so latou leo ia i latou ia na o atu fai uiga mataga i fafo. O le itu foi e faapea e eseese, e sao. A o la lava e iloa tonu le nuu na alu atu ai, po o fea lava la le keni na alu atu ai a o la e iloa le nuu na alu atu ai ma o le faiga la lena o lea ua i ai nei.

O le itu i tagata faimalaga mai, o le mea lea e tupu ia tatou o la foi e tupu i isi atunuu, e tupu uma lava i atunuu se i vagana tagata solitulafono o lea ua i totonu o le Interpol e te laa mai loa pue oe i ina. E pue lava oe i ina e le computer lea ua i ai tagata solitulafono faava o Malo ma ua i ai o latou igoa. E pue ai lava oe i ina ma taofi ai oe. E i ai lava la tagata e sao mai ma o latou la na ma e aoga foi mea e tutupu e saga vaavaai atili ai foi i latou o lo o gafa ma le vaaiga o latou ia e omai mai fafo, i itu ia e pei ona laga, ae e le umi lava ona iinei ae iloa foi. Ona pau lava le itu o le vave iloa ona fai lea i ai o le faaiuga e tataua ona fai.

Lau Afioga i le Fofoga Fetalai, o le tali atu lena i mataupu sa laga e sui usufono.

**FOFOGA FETALAI:** Malo faafetai. E manatu o lea ua tali le Malo, ae tuu atu pea i lau Afioga i le Taitaifono pe i ai se isi mea faaopoopo.

**Afioga Hon AEAU PENIAMINA LEAVAISEETA:** E laititi lava sina faaopoopoga. Faafetai i le fesili o lea ua faafofoga i le faamalamalamaga auiliili a le Afioga i le Palemia aemaise lava mataupu ogaoga ia.

Ua ou tulai atu lau Afioga i le Fofoga Fetalai ona o le agaga faafetai a le Komiti nei i le vaega 3 o le matou Recommendation lena sa avatu ma ua uma ona faatino. Na faatino e le Ofisa o le Fono Aoao, le Afioga i le Fofoga Fetalai faapea le Failautusi. O le agaga faafetai lea o le Komiti aua tasi lea mea taua ua matua serve lelei le purpose o le tulaga lea, a o isi vaega ou te talitonu ua malamalama le faafofogaaga a sui mamalu.

Na ona ou fia faaopoopo i le mea lea. O le nuu lena o Falealupo e aafia ai i le vaega lea e o i fafo. Ou te fiasia e faasilasila atu o se tasi o le nuu lena e taitaia vaega ia e le gata i le nuu ae ua fiasia tele Kamupani i fafo ma ua talosagaina le Falealupo lea ina ia ona vaaia uma lava so o se Samoa e alu atu i le faatoaga lea. O lona uiga e pei o le agaga lea e fia momoli atu ai ona e pei e amata mai i le afioaga ma le nuu. A lelei pulega i ina, e faapena foi tagata uma.

**9 OKETOPA 2013**

**P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga**

Talofa i le Palemia ma ana fuafuaga lea ua fai nei, a o le tulaga mulimuli lea e pei ona fesili le susuga.....ia faafetai o lena ua e faafofoga mai i le saunoaga a le Palemia. E faigofie lava, e easy offset uma ae leai se tupe.

Faafetai tele lau Afioga i le Fofoga Fetalai.

*Na faamaonia le Lipoti:*

**P.P.2013/2014 NU.30, LIPOTI A LE KOMITI O TUPE MAUA MA TUPE TOTOGI I LE P.P.2012/2013 NU.92, FUAFUAGA AUTASI A LE OFISA O LE FAILAUTUSI O LE FONO AOAOFAITULAFONO MO LE 2013-2015 - ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ma le faaaloalo tele ou te faatu le lafo, *Ina ia faautagia e lenei Fono Aoaofaitulafono le Lipoti a le Komiti o lo o tuuina atu ai ana Saililiga, Fautuaga ma ana Iugafono.*

*Faaluaina e se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow, le sui usufono mo Sagaga le Usoga ma le sui usufono mo Aleipata Itupa i Lalo.*

**FOFOGA FETALAI:** Tulai mai lau Afioga i le Taitaifono.

**Susuga Hon PAPALIITELE NIKO LEE HANG:** Lau Afioga i le Fofoga Fetalai o Saililiga nei a le Komiti.

**“SAILILIGA:**

*O le Fuafuaga Autasi 2013 – 2015 a le Ofisa o le Failautusi o le Fono Aoaofaitulafono o loo atagia ai le naunautaiga ina ia tuuina atu tulaga talafeagai i taualumaga Faa-Palemene ma Sui Usufono i le faaliliuina ma le faatinoina o le faatomuaga o le tuuina atu i le “Palemene ma Sui Usufono o le auaunaga aupito i maualuga mo le faasologa o le Palemene ma le Fono Aoaofaitulafono.”*

## 9 OKETOPA 2013

P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga

O lea e atagia ai le taua o galuega faa-Palemene ma le manaoga ina ia mautinoa ai le faatinoina o galuega a le Palemene ina ia faailoaina le tutoatasi o le Palemene ese mai le Pulega Faatonu ma le Vaega o Faamasinoga i ana matafaioi faale-Tulafono ina ia mafai ona uunaia faiga faa-Temokarasai i Samoa.

E i ai le manatu afai e le o malamalama totoa i le natura o le Palemene, e le mafai i Sui Usufono ona taliaina atoatoa le taua o le galuega a Sui e faia i le Palemene ina ia mafai e le Vaega ona faatinoina uma latou tiute tauave.

Ua maitauina e le Komiti o le Fuafuaga Autasi 2013 – 2015 o le lomiga muamua leni o se Fuafuaga Autasi mo le Ofisa o le Failautusi o le Fono Aoaofaitulafono ma e tasi le tausaga sa tuufaatasia ai. Ua faamalieina le Komiti i le sini autu o leni faamoemoe galuega faatinoina ma le naunautaiga a le Failautusi, Pulega ma le Afaigaluega aemaise mo le ausia ai o se taunuuga o fuafuaga faataatitia.

Ua maitauina foi e le Komiti o le faamoemoeaga autu o le atinaeina o le Fuafuaga Autasi sa atinae e ala i ni faatalatalanoaga vavalalata ma tagata faigaluega uma ma paaga totino, ma o lo o lagolagoina fuafuaga ua auiliili lelei mo faatinoga a vaega taitasi. Na taua e le Pulega, o sini ua faatulagaina e anoanoai luitau ae mafai ona faatinoina ma ausia e moomia ai le fuatia o lagona naunau ma le lagolagosua o le afaigaluega.

### SINI AUTU:

O le Ofisa o le Failautusi o le Fono Aoaofaitulafono ina ia *“tuuina atu i le Palemene ma Sui Usufono auuaunaga aupito i maualuga i le Faasologa o le Palemene ma le Fono Aoaofaitulafono pei ona auiliili mai i tulafono ma le Tulafono Tumau a le Palemene”*

### GALUEGA UA AUSIA:

Ua maitauina e le Komiti i le faagasologa o leni atinae o le Fuafuaga Autasi 2013 – 2015, na faagasolo le toefuataiga le faatulagaga o Galuega tusa ai ma fautuaga pei ona faalia i se suesuega tutoatasi a le Pulega o Afaigaluega e lagolago i le Ofisa.



**9 OKETOPA 2013**

**P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga**

**O nei suiga e aofia ai ma le faatulagaina o Vaega Eseeese ma faatulaga i lalo o vaega galulue autu pei ona taua i lalo;**

- a) **Ofisa o le Failautusi o le Fofoga Fetalai.**
- e) **Ofisa Faa-Failautusi ma sootaga Faa-Palemene Faava-o-Malo, Poloketi.**
  - i. **Vaega o le Maota ma Tualumaga Faa-Palemene.**
  - ii. **Vaega o Komiti Faa-Palemene.**
  - iii. **Vaega e Faufautua Faale-Tulafono ma Suesuega.**
- i) **Vaega o Lagolago Faa-Palemene.**
  - i. **Vaega e Faamalasia le Faalapotopotoga.**
  - ii. **Vaega o Auaunaga tau Tupe Faafoega ma Lagolago.**
  - iii. **Pulega o Nofoga ma Fale.**
- o) **Vaega o Faamatalaga Faa-Palemene.**
  - i. **Vaega o Sootaga ma le Atunuu Lautele.**
  - ii. **Auaunaga o le Pulega o Faamatalaga.**
  - iii. **Vaega o Faamatalaga Fesootaiga ma Tekonolosi.**
  - iv. **Vaega o Faamaumauga Aloaia ma Lomitusi.**
  - v. **Vaega o Faaliliu ma Faamatala upu.**

**Na maitauina e le Komiti i lalo o vaega galulue autu e tolu sa atiae faapitoa e lagolagoina galuega aloaia a le Palemene, le tuuina atu o auaunaga o faamatalaga tau tomai faapitoa e lē gata i le Palemene ae faapea foi paaga totino ma lagolagoina le siosiomaga o nofoaga ma galuega lea o lo o galulue ai le Palemene ma le Ofisa.**

**ILOILOGA:**

**O loo mataituina e le Komiti le faasologa ma le taua o matafaioi o loo nafa ma le Ofisa o le Failautusi o le Fono Aoaofaitulafono:**

- a) **Ina ia faatinoina ai tiute ma matafaioi mo le, e ao i Sui o le Palemene ona faia o latou tiute tauave ma matafaioi pei ona taua i lalo:**
  - i. **Faitulafono**
  - ii. **Fai ma Sui**
  - iii. **Mataitu Pulega o Faiga Malo lelei ma le mafai ona tali atu.**

## 9 OKETOPA 2013

P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga

- e) Ina ia mafai e Sui Usufono o le Palemene ona faatinoina o latou tiute e tusa ai ma manaoga o Itumalo, e ao i le Ofisa o le Failautusi o le Fono Aoaofaitulafono ona tuuina atu le fesoasoani tau auaunaga e talafeagai ma lo latou siosiomaga.

Na maitauina e le Komiti le taua o le galuega lagolago o lo o tuuina atu e le Ofisa mo Sui Usufono aua le faatinoina o latou tiute e pei ona aiaia i tulaga Faa-Palemene.

Na maitauina foi le naunautaiga o le Ofisa ina ia mafai ona ofoina atu le lagolago i galuega Faa-Palemene aemaise i Sui Usufono i le faamalosi lea o le itu tau agavaa ma tomai e faatino ai nei galuega lagolago.

E tusa ai ma sailiiliga a le Komiti na matauina ai e tolu (3) Faauluuluga o Vaega (Ofisa Sili Lagolago o Pulega) na amata faafaigaluega i le \$65,000 i le tausaga i lalo o le Poloketi o le Atinae o Galuega Faa-Palemene a Samoa, ae lua (2) Faauluuluga o Vaega (Ofisa Sili Lagolago o Pulega) o lo o faafaigaluegaina e le Ofisa.

- *Faauluuluga, Vaega o Sootaga ma le Atunuu Lautele (SPSP).*
- *Faauluuluga, Vaega o Faamatalaga o Fesootaiga ma Tekonolosi (SPSP)*
- *Faauluuluga, Vaega Auaunaga o le Pulea o Faamatalaga (SPSP)*
- *Faauluuluga, Vaega Faamaumauga Aloaia & Lomitusi (OCLA)*
- *Faauluuluga, Vaega Faaliliu & Faamatala Upu (OCLA)*

E talitonu le Komiti e tatau ona tutusa uma totogi o avanoa mo Ofisa Sili Lagolago o Pulega.

### TOATUGA O TUPE MA MEATOTINO:

Na maitauina e le Komiti o lo o feagai le Ofisa ma faafitauli tau tupe e pei e tusa ai ma vaegatupe o lo o faamatuu mai e le Matagaluega o Tupe ona o le tele o nisi o vaega o lo o ave i ai le faamuamua.

## **9 OKETOPA 2013**

**P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga**

Na maitauina foi e le Komiti le eseese o totogi o avanoa fou mo Faauluuluga i lalo o le Poloketi o le Atinae o Galuega Faa-Palemene a Samoa ma avanoa Faauluuluga i lalo o le paketi a le Ofisa ma e ao ona toe fetuunai mai le WSS\$65,000 i le WST\$81,600. E fua lea tulaga i tiute ma matafaioi o lo o faatino i le tulaga Faa-Ofisa Sili Lagolago o Pulega.

O se tasi o vaega na māua e le Komiti o fale o lo o i ai nei e pei o le Maota o Tofilau Eti Alesana ma le Ofisa tuai o le Ofisa o le Fono ua amata ona faaleagaina. O se tasi lea o itu o lo o faatalanoaina e le Malo o Ausetalia ma Samoa mo le fausiaina o se Maota Fono fou aemaise se Ofisa mo le Ofisa o le Failautusi o le Fono Aoaofaitulafono. O faafitauli e pei o lologa, alavai ma isi faalavelave faanatura o lo o silasila i ai le Komiti Faatonu o le Poloketi mo le Maota Fono fou.

### **MATAITUINA, ILOILOGA MA LE FAAAUUPEGAINA:**

Na maitauina e le Komiti ina ia mautinoa ua faaauau ona tuuina atu o lenei fuafuaga se vaaiga taulai ma tumau ona mafai ona tali atu ai i suiga, e ao i le Ofisa o le Failautusi o le Fono Aoaofaitulafono ona toe iloilo aloaia ma tuuina i tulaga aupito i lata mai i le 6 masina pea maea se Fuafuaga ua faataatia po so o se taimi talafegai. Faafetai e le Komiti le Ofisa i le faaoga tatauina o fonotaga masani a le Pulega ma se auala faaopoopo e toe auiliili ai le faagasologa o le Fuafuaga ma avea ma mataupu tumau o fonotaga uma a le Pulega.

Na mataituina e le Komiti le taua o le tuufaatasia i totonu o galuega faatino e le pulega. Faaopoopo ai ma le faamauina o faasologa e fai mo le mataituina ma tuliloaina ai o galuega faapea ma le faaalu faatatau o tupe.

### **FAUTUAGA:**

**I le maea ai o ana Iloiloga, e fautuaina e le Komiti le Malo:-**

- 1. Ina ia feutagai le Ofisa o le Failautusi o le Fono Aoaofaitulafono ma le Matagaluega o Tupe mo le toe iloiloaina o totogi mo Faauluuluga o lo o taua i lalo mai le \$65,000 i le \$81,000 i le tausaga ina ia laugatasi ma tulaga o totogi ma faamanuiaga a le Malo.**

**9 OKETOPA 2013**

**P.P.2013/2014 Nu.30, Lipoti a le Komiti o Tupe Maua ma Tupe Totogi i  
le P.P.2012/2013 Un.92, Fuafuaga Autasi a le Ofisa o le Failautusi o le  
Fono Aoao Faitulafono mo le 2013-2015 – Iloiloga**

- a. Faauluuluga, Vaega o Sootaga ma le Atunuu Lautele (SPSP).
  - b. Faauluuluga, Vaega o Faamatalaga, Fesootaiga ma Tekonolosi (SPSP).
  - c. Faauluuluga, Auaunaga o le Pulea o Faamatalaga (SPSP)
  - d. Faauluuluga, Vaega o Faamaumauga Aloaia ma Lomitusi (OCLA).
  - e. Faauluuluga, Vaega o Faaliliu ma Faamatala Upu (OCLA).
2. Mo le Matagaluega o Tupe ina ia faatatauina ni vaegatupe talafeagai mo le Ofisa o le Fono Aoao Faitulafono i le Tala Faatatau o Tupe mo le Tausaga Faaletupe o lumanai, (ina ia mafai ai ona faatino le auaunaga ma le lagolago a Ofisa o le Fono mo le Palemene ma Sui Usufono) ma ausia ai o Sini o le Fuafuaga Autasi, aemaise le atinaeina ma le faatumauina o loo taua i lalo:
- a. Faamatalaga – Faamalosi le maua ai e Sui Usufono o le avanoa i faamatalaga.
  - b. Auaunaga Tau Suesuega – Atiae se auaunaga tau suesuega Faa-Palemene e tuuina atu le lagolago i Sui Usufono aemaise o Sui o Komiti Filifilia ma le aufaigaluega Faa-Palemene.
  - c. Fuafuaga Faataatia mo Sootaga ma le Atunuu Lautele – e moomia le malamalama o tagatanuu ma auai i faiga Faa-Palemene e lagolago ai se faiga faatemokalasi soifua maloloina.
  - d. Auaunaga Tau Lumanai Manuia – faavaeina se auaunaga mo le lumanai faamautuina ai le tofiaina o Ofisa Sinia Faa-Palemene.
  - e. Polokalame mo le Atinaeina o Tomai Faapitoa – O se Polokalame faaauau mo le atinaeina o tomai faapitoa mo le aufaigaluega a le Ofisa o le Failautusi o le Fono Aoao Faitulafono i le siitia o le agavaa aua le lelei faatino o latou matafaioi.
3. Ina ia faamatuu atu e le Matagaluega o Tupe vaegatupe talafeagai e lagolago ma faatumauina ai le Poloketi o le Atiae o Galuega Faa-Palemene a Samoa, ona o le taua o le atinaeina o tomai faapitoa o Sui Usufono ma le Aufaigaluega Faa-Palemene.

P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga

4. Ina ia faamatuu mai e le Matagaluega o Tupe se vaegatupe talafeagai e lagolago ma faatumauiina ai le Faigapaaga Faa-Palemene a le Pasefika ma le Faigapaaga Faa-Palemene a Tamaitai o le Pasefika ma i si sootaga Faa-Palemene Faava-o Malo mo le Palemene o Samoa.

**IUGAFONO:**

I le maea ai o iloiloga a le Komiti, na faaiugafonoina ai e fautuaina le Fono Aoaofaitulafono.

Ina ia faamaonia le P.P. 2012/2013 Nu. 92, Fuafuaga Autasi a le Ofisa o le Failautusi o le Fono Aoaofaitulafono mo tausaga 2013 – 2015.”

**FOFOGA FETALAI:** Malo faafetai saunoa i lau Afioga i le Taitaifono. Ia tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga mo le avanoa. E momoli foi le faafetai i le Komiti, ae fia fai se manatu i le taua o leni Fuafuaga Autasi a le Matagaluega ua tuuina mai. E le na na ma le laina le sao o le Maota i le Failautusi ma le Afaigaluega i galuega fai a le Maota Fono nei.

A tatou maitau foi i tausaga ua tatou i ai nei i le Palemene i lou lava sui usufono, ua faatupulai Tulafono ua tuuina mai le Palemene i aso fai pea, e le gata i le faatupulaia o Tulafono mo le iloiloa e le Palemene, ae faatupulaia foi o galuega fai. Ou te talitonu o le taimi muamua leni ua faataunuina ai leni vaega i totonu o le afaigaluega ina ia siitia le gata o tagata faigaluega, aemaise o faamanuiaga, o le tomai ma le agavaa e faatino ai galuega. O le Maota sili leni o Samoa, o i e fai ai tonu o le atunuu nei, ma e tatau ona lava tapena i tomai ma agavaa i latou o galulue aua le Maota Fono ina ia mautinoa ia Tulafono, o faamaumauga, o mea uma e tuuina mai i totonu o le Palemene leni o loo sao ma talafeagai. O lea e avatu ai le lagolago a lou nei sui usufono i le fuafuaga mamao ua tuuina mai.

Faafetai foi i le Malo Ausetalia, Malo Afaatasi i vaegatupe ua tuuina mai e amata ai leni poloketi. Ae ao i le Malo ona faaavanoa mai ia vaegatupe pei ona talosagaina aua le faaauauiina o leni poloketi, aemaise le fetuunaiga o totogi e pei ona atagia mai, aua o le mea e pei ona tagai ane i ai e tusa lelei lava pe sili atu foi galuega ia o lo o faatino e vaega taitasi o pulega nei, a o lea e maualalo ifo le totogi lea o lo o totogi ai i le taimi nei i lo isi Matagaluega a le Malo.

## 9 OKETOPA 2013

**P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoao Faitulafono mo le 2013-2015 – Iloiloga**

O lona uiga, e talafegai ma alagatau ona fetuunai ina ia atagia tutusa ia faamanuiaga o lo o maua uma e tagata faigaluega a le Malo, aemaise lava i nei i le Maota Fono ina ia mafai ona taofiofi le tomai ma le agavaa, aua e ese foi tomai ma agavaa iinei i le Maota Fono latou, e le o ni tomai e soona ao i isi aoga ma iunivesite. E faapitoa foi lo latou tomai i le umi na e galue ai iinei.

**FOFOGA FETALAI:** Malie le sui usufono o lo o saunoa sei tuu atu le avanoa i le Afioga a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, faafetai lava i le saunoaga a le sui usufono. O le matafaioi lena, o le matafaioi e le faigofie, aua tatou te nofo ma pei e sii le isi Matagaluega ae tuu i lalo isi.

E le faigofie le mea lena, ma o loo i ai lava i le Kapeneta le tiute o le ala foi lena na ala ai ona faatulai le tatou Tribunal, o loo galulue pea le Tribunal, e latou te vaaia le lautele o le afaigaluega. Ua uma aso la, a tulai ane lava lea ua tataua ona sii le matou Matagaluega sii. O le mea lena na ala ai ona tulai mai teva i mea nei o mea tau totogi. Pe te siia i se CEO i le \$1miliona, e le taitai lava ona lava, e le taitai lava. Po o le tuu i ai o le \$100miliona e le taitai lava. O le mea lea e taumafai ai le Malo, ia i ai se tulaga e faalaugatasia uma ai Faaululuga o Matagaluega. O lea la e iai le scale i le taimi nei, ma o le mea moni tasi lena mea o lea e le uma le faitio mai ai o le Private Sector i le Malo, ua maualuluga tele totogi o le afaigaluega a le Malo, ua afaina ai ma totogi o latou afaigaluega. O lona uiga o lea mea, e pumoomoo lava le mea lea e te saunoa mai ai. E lautele le vaai a le Malo, e le gata ina vaai le Malo i le vasaga o totogi i totonu o le Malo, ae vaai foi i le vasaga o totogi ma latou o lo o galulue i fafo, fafo atu o le Malo. Aua e sasi loa i, oti atoa le economy, aua o i ina tonu lava e oti atoa ai ma le taumafaiga a latou o lo o galulue o lo o faia le tulaga o le atinaeina o le atunuu i a latou lava pisinisi. E oo mai lava i le taimi lena, lea na tusi mai isi ua tupu le faalavelave i latou skill workers i le tulaga o ave masini lea ua omai o i le taugaapu. A o le mea lea o le skill, o le tomai o le aoga o le aveina o masini excavator, e le o se tomai e puupuu le taimi e aoao ai. Ia lea foi la ua fautuaina le vaega lea e vaai lelei, o tagata uma a e i ai ni o latou special skills e ono afaina ai lea atinae o ia foi tagata o loo atinaeina le tatou Malo, taofi uma, ae ave na o latou ia e leai ni galuega, e ave i fafo e tauapu.

Lau Afioga i le Fofoga Fetalai, o le itu lena e faigofie a ona faaoloataua ai ia le mea lea o le sii o le talanoa ma sii i luga se vaega, ae tataua ona vaai lautele i le au tautua a le atunuu o loo galulue i vaega eseese a le Malo, taatia mai pea le mataupu a le Kapeneta o lea e fai ma tilotilo malie pea i ai le Kapeneta, aua e sese loa agai uma mai loa i i tupe ae leai ma se atinae e toe faia.

## **9 OKETOPA 2013**

**P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015 – Iloiloga**

E le faapea o tele ni a tatou seleni o lea foi e fai fuafua seleni, lea foi e aumai seleni mai fafo e aumai e faatino ai a tatou atinae ona e le faapea o tele ni a tatou seleni o maua. O lea e tau fuafua lelei i lea atinae ma lea atinae ma lea atinae ma vaai totoa foi i totogi o tagata o le Malo.

Lau Afioga i le Fofoga Fetalai, o lou tulai atu lena ona ou te vaai atu i le sui usufono ua matua afu lelea i le taumafaiga mai o le mataupu, a o le mataupu lea e matua fefe tele agelu e laa i ai. Na o mataupu a le tuutuu loloto i ai le tofa, o i tonu lava e malepe ai le Malo i tulaga mo mea o faatulagana o taui o tagata. E tataua ona tuutuu loloto le tofa, e te le mafai ona e tulai mai, fai mai e sili le matou Matagaluega i le Matagaluega le la, sili le Matagaluega le la i le isi Matagaluega. I le vaai a le Kapeneta e tutusa uma lava. Lau Afioga i le Fofoga Fetalai, o le fesoasoani atu lena.

**FOFOGA FETALAI:** Ou te faamalulu atu i le sui usufono mamalu, leaga o lea ua tatou taunuu...

**Tofa LEALAILEPULE RIMONI AIAFI:** Ia, o lea o le a faauma atu lau Afioga, e vave lava leaga o lea ua tuuaia au e le Afioga i le Palemia.

**FOFOGA FETALAI:** Ia, o le a tuu atu pea le avanoa.

**Tofa LEALAILEPULE RIMONI AIAFI:** O le mea tonu lava lea na avatu ai lou manatu. A tagai i le Lipoti, o le talosaga o lo o aumai i le Matagaluega ia faalaugatasia i latou ma isi Matagaluega a le Malo. O lea e pau laititi latou i lalo. E le o talosaga mai le Matagaluega po o avatu sau faamatalaga e sii atu i luga o isi vaega. E leai, o lea e auai lou manatu ina ia faalaugatasia totogi o le Matagaluega i tulaga ia ua i ai nei ma isi Matagaluega, aua a tagai i isi Matagaluega a le Malo, o le matua tetele o totogi. O le Salary Tribunal lea na saunoa i ai le Afioga i le Palemia, ou te matuai ou manao e tuu. Ioe, o le vaega lena o lea ua siia ai nei totogi i lou lea talitonuga...

**FOFOGA FETALAI:** Malie le sui usufono o lo o saunoa se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e te fou mai i totonu o le Palemene, a o le mataupu lava lena e laga mai loa e Matagaluega e laititi matou totogi ae maualuluga tele le vaega le la. Ae a oo loa ina faagasolo gaioiga a le Malo, e i ai lava le scale e mulimuli uma ai le aufaigaluega, ma o ina e vaai totoa i ai le CEO ina ia vasaga lelei tulaga o scale a le aufaigaluega ma tulaga foi o isi aufaigaluega a le tatou Malo.

**FOFOGA FETALAI:** Ia faauma maia le saunoaga.

## 9 OKETOPA 2013

P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Un.92, Fuafuaga Autasi a le Ofisa o le Failautusi o le Fono Aoao Faitulafono mo le 2013-2015 – Iloiloga

**Tofa LEALAILEPULE RIMONI AIAFI:** Na pau lava lena ou te lagolagoina le Tulafono i le matagofie o le tulaga i le talosaga a le Matagaluega ina ia faalaugatasia uma Matagaluega a le Malo aemaise tulaga o i ai nei i tulaga fou ina ia atagia tutusa ma ia mafai ona taofiofia le tomai lea le experience a lea ua ao i totonu iinei, aua le Maota Fono. Ou te le i tautala faapea e sili se isi Matagaluega i se isi Matagaluega, leai, o le faamamafa a au o le taua, e taua foi galuega o lo o feagai ma le tatou Matagaluega iinei ona o le Maota Fono o Samoa ma le Palemene. A o mea ia o salary scale, e sao le Afioga i le Palemia, leaga o au sa i ai i le tusiga o le salary scale a le PSC sa i ai. E i ai foi sina ou malamalamaaga i ai.

Ia manuia le Fono.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Toe pau lava lea o le mea ou te tulai atu ai, aua e te popole i le tulaga lea o le taofiofiga o tagata. Ia a o fea o le a o i ai?

**FOFOGA FETALAI:** Malo. Ia e manatu, ua manino ma malamalama le mataupu. Le sui usufono mo Faleata Sisifo, ia, o lea ua e promote e le se mea natia lena mea lea foi ua malamalama le taumafai atu a le Malo, lafo laia i le Kapeneta o lou finagalo. O le mea sili lea ua faailo vea e le Afioga i le Taitaifono i le talosaga vaivai a lenei Matagaluega, ia alofagia le Matagaluega o le Fono. Lafo laia i aao o le Kapeneta ma latou o lo o faia faaiuga ma le Matagaluega o Tupe, ou te lagona o i ina e sau ai le tali mo tatou.

Ia e momoli atu le agaga faafetai tele lenei aso, e talitonu ua tatou taunuu i le taunuuga o le tatou galuega mo lenei Aso Fono, ma e le faaitiiti ai le agaga faafetai e momoli atu i le onosai mai o le paia ma le mamalu o le tatou Maota nei o lea ua tatou taunuu i le tatou taimi malolo a o le aso mulimuli foi lenei o le tatou Fono mo lenei masina ona o lo o tele nisi o galuega o lo o fuafua. O lo o i ai foi nisi o tulaga taua e tataua ona auai atu iai au nei ma le Sui Fofoga Fetalai, ona o le tuua o le Malo e nisi foi sa auauna mo le atunuu aemaise nisi o galuega a le Kapeneta ma le Palemia, aemaise foi nisi o tuatuaanoa o le tatou Maota. Ou te manatu ai ua faauma ai le tatou Fono mo lenei masina o le a tatou faia le upu foi lea, “E le uma le fai aso o le Alii” ae tatou tolopo mo lenei Fonotaga ona faagasolo ai lea o le tatou Palemene mo le masina fou.

Ae faafetai atu i le tapuaiga ma le faalogologo mai a le tatou atunuu i ona tulaga faalupe Samoa, ia e momoli atu le agaga faafetai tele ona o lo outou tapuaaoina pea o la matou Fonotaga, e talitonu ua ae manuia faiva o lou Palemene talu le tapuaiga a oe si ou atunuu. A o lenei itula ou te tuu atu le avanoa i lau Afioga i le Palemia mo le lafo e tolopo ai le tatou Fono.



9 OKETOPA 2013

LAFO MO LE TOLOPOINA

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioa i le Fofoga Fetalai, o le lafo, *Ina ia tolopo nei Taulumaga a le Fono Aoa, tolopo seia aulia le itula e 9:00 i le taeao o le Aso Lua, 17 Tesema 2013.*

Ma a o le i aumaia le Fesili, e avatu lau faamanuia aua o le Aso Sa nei, o le Aso Sa Paepae o lo o tatou tapena uma atu i ai. Ia manuia tauloto ua saunia mo le Aso Sa.

*Faaluaina e le Sui Palemia.*

*Na faamaonia le lafo.*

FOFOGA FETALAI: Ia, ou te tuu atu le avanoa lenei i se tasi o sui usufono mo Salega, Tofa Tapuai Toese Ah Sam e tulai mai e saunoa faaiu i le tatou Fonotaga e ala i lenei masina i se tatalo.

Tatalo.

*Na tolopo Taulumaga a le Fono Aoa i le itula e 1:00 i le aoaulia seia aulia le itula e 9:00 i le taeao o le Aso Lua, 17 Tesema 2013.*